

OBSERVATIONES

AD

MORALEM SIVE PRACTICAM

LIBRORUM SACRORUM

INTERPRETATIONEM PERTINENTES.

---

SCRIPSIT

ΦΙΛΑΔΗΘΗΣ ΕΠΙΔΑΙΡΩΝ.

---

LIPSIÆ

REDEMTORE CHRIST. THEOPH. RABENHORST.

MDCCLXXXVI.

AMERICAN UNION

AMERICAN UNION

AMERICAN UNION

AMERICAN UNION

AMERICAN UNION

AMERICAN UNION

---

**L E C T O R I**

**ERUDITO ET AEQUO**

**S,**

**A U C T O R.**

---

**P**er pauca sunt, quae huic libello praefari rationes meae iubeant. Consilium quidem ipsum, quod in componenda hac scriptione secutus fuerim, legentium oculis ultro se offeret; hincque non opus videtur, ut de illo nominatim nunc exponam.

Si qui vero sint, qui passim quaedam paulo liberius et audacius a me statui credant, hi secum reputent, oro, partim, qui animos diffidentes sibi invicem reconciliare et lites componere velit, eius personae hanc peculiarem iniunctam esse muneris necessitatem, ut singulis litigantium partibus interdum aliquid largiatur, quod ipse ad sensu suo comprobare nolit, partim totam hanc qualemcumque commentationem solis doctis Viris, quam examinent et, si tanti res videatur, in usum suum convertant, destinata esse. His autem, qui ipsi sapiunt et bona a malis scienter distinguere didicerunt, talia et

iam proponere, quae omnibus eodem modo probatum iri vix sperare licet, quid impediat? *παντα γὰρ καὶ ἀρεὰ τοῖς καὶ ἀρεοῖς.* Tit. I, 5. Eam quoque ob causam stilo latino usus sum, ut indocta et imperita multitudo, cuius nulla est de talibus rebus iudicandi facultas, a lectione huius libelli arceretur.

Fictum auctoris nomen, quod in fronte exstat, lectores, quocumque placeat, modo interpretentur, dum ne pro arrogantiae signo habeant, quod profecto non est. Verum autem et proprium mihi nomen profi-

teri, nunc quidem non licet. Quare  
 si quis ulla aliqua ratione illud com-  
 pertum habeant, hos vehementer ro-  
 gatos cupio, nolint divulgare.

Quod reliquum est, iam in ante-  
 cessum gratias iis ago, qui hoc mihi  
 gratum facturi sint; ut, quidquid a  
 me peccatum fuerit, amanter notent ac  
 corrigant. Dabam nundinis auctumna-  
 libus Lipsiensibus, A. C. MDCCLXXXV.

---

# OBSERVATIONES

AD

MORALEM SIVE PRACTICAM LIBRORVM SACRORVM INTERPRETATIONEM PERTINENTES.

---

Ἐκαστος καὶ ὡς ἔλαβε χάρισμα.

---

**A**llegoricam et mysticam libros sacros interpretandi rationem, quae sensum verborum non ex legibus linguae et recto iustorum praesidiorum usu, sed ex vanis ingenii lusibus metitur, quamque e Iudaeorum scholis <sup>1)</sup> ad Christianos doctores

- 1) Prima allegoricae interpretationis origo apud Iudaeos repetenda est a doctoribus Alexandrinis, quibus temporis rationes hanc perversam librorum sacrorum tractationem persuaferant, Vid. I. G. KOERNER I. *de allegorica interpretandi ratione*. Lips. 1782. 4. ZIEGLER I. *Einleitung in d. Brief an die Hebräer*. Goetting. 1791. 8. p. 155. sqq. 272. sq. EIUDEM *Kritik über den Artikel von der Schöpfung nach unsrer gewöhnlichen Dogma-*

transiisse 2), et ab his per omnia secula magis minusve propagatam, excultam, commendatam

*tik*; in HENKII *Magazin für Religionsphilosophie, Exegese u. Kirchengeschichte*. Vol. II. Part. I. p. 70. sqq. EICHHORNII *Briefe die biblische Exegese betreffend*; in *f. allgem. Biblioth. d. bibl. Litterat.* T. V. epist. 3. p. 233. sqq. POELITZ *Beitrag zur Kritik der Religionsphilosophie und Exegese unsers Zeitalters*. Lips. 1795. 8. p. 363. sqq. — Pertinet huc locus Sirac. XXIV, 23—29. — Omnes Iudaicae interpretationis ineptias pluribus descripsit EISENMENGER *im entdeckten Judenthum*. T. I. Cap. IX. p. 453. sqq.

- 2) Christum et Apostolos in tradenda doctrina sua vulgarem Iudaicorum doctorum interpretandi et disputandi methodum secutos fuisse, dubio caret. Cf. KOPPE in *Excurs. I. ad epist. ad Roman. et annotat. ad Galat.* IV, 21. sqq. EICHHORN, in *f. Biblioth. d. bibl. Litter.* T. II. p. 497. sqq. et, qui ex instituto hanc rem diligentius tractarunt, GVIL. SURENHUSE ספר העשרה fide βίβλος καταλλαγης. Amstelod. 1713. 4. atque ECKERMANN in *f. theologisch. Beyträgen*. T. I. II. Alton. 1791. 1792. 8. Num sacri Nov. Test. auctores in citandis et explicandis V. T. dictis, ad Messiam nominatim spectantibus, tantum ad popularium ingenium atque opiniones sese accommodaverint; an vero allegoricum, ab ipsis expressum, sensum verbis proprie inhaerere putaverint, de eo non consentiunt viri docti. Subtilius nuper huius quaestionis solutio descripta est in EICHHORNII *Biblioth. d. bibl. Litter.* T. V. p. 420. sqq.



esse constat 3); omni certo fundamento destitui neque adeo ullo modo admitti probarique posse idonei harum rerum iudices iam dudum unanimi consensu statuerunt 4). Hinc factum est, ut ex quo hac recentiori aetate HUGO GROTIUS ipsa

A 2

3) Vid. I. F. BVDDEI *Isagoge ad theologiam universam*. Lipsi. 1730. 4. p. 1372. sqq. G. I. PLANCKII *Einleitung in d. theolog. Wissenschaften*. T. II. (Lipsi. 1795. 8.) p. 127. sqq. et I. G. ROSENMVELLERI X. *Commentt. de fatis interpretationis sacrarum literarum in ecclesia Christiana*, quae inde ab anno 1789. Lipsiae prodierunt et statim temporibus continuabuntur. Quem nuperime venerandus ROSENMVELLERVS edidit librum: *historia interpretationis sacrarum literarum in ecclesia Christiana inde ab Apostolorum aetate usque ad Origenem*. T. I. Hildburghuf. 1795. 8. is sine dubio has ipsas Commentationes in unum collectas, vel saltem aliquam earum partem continet. Ipsa libri huius videndi copia nondum mihi facta est. De Clemente Alexandrino et Origene, maximis allegoricae interpretationis fautoribus et patronis, singulatim ac diligentius disputavit KOERNER in Specc. II. *de allegor. interpr. ratione*. Lipsi. 1782. 4. Num continuata sit et absoluta haec Koernerii disputatio, nec ne, equidem nescio.

4) Laudasse sufficiat unum ERNESTIVM in *institut, interpretis. Nov. Test.* Part. I. Sect. I. Cap. I. §. 7—II. p. 18. sqq. ex edit. *Annonii*. Lipsi. 1792. 8.

periculorum fide 5), et SALOMO GLASSIUS praeceptorum bonitate 6) veriore[m] atque sanio-rem interpretationem instaurare et praeire coepif-  
sent, perversum istud interpretandi genus sensim  
obsolesceret et ita tandem everteretur, vt neque  
convitiolorum, quibus GROTII studia ab importu-  
nis seculi superioris clamatoribus proscindebantur,  
atrocitas 7), neque *Coccejanorum* furor 8), ne-

5) Scripsit *Annotationes in Vet. et Nov. Test.* Lu-  
tet. Paris. 1741. sqq. V. Tomi. fol. quarum ea est  
indoles, ut *Grotium* caput esse hodiernae inter-  
pretationis grammaticae, et ex eius fontibus  
omnes, qui post fuerint, interpretes hausisse iu-  
dicaverit ERNESTI l. l. Part. III. Cap. IX. §. 36.  
p. 301. Cf. etiam NOESSELT *Anweisung zur*  
*Kenntniß der besten allgem. Bücher in allen Thei-*  
*len der Theologie.* §. 119. p. 163. sq. ed. 3. Lipf.  
1790. 8.

6) Eius Opus, *Philologia Sacra* inscriptum, quod  
nunc in animo habeo, primum prodiit Franco-  
furti ad Moenum. 1643. 4. Tomum I. *his tem-*  
*poribus accommodatum* typis exscribendum cura-  
vit I. A. DATHE. Lipf. 1776. 8. Continuationem  
operis, in novam plane formam redigendi,  
promisit G. L. BAUER, hisque suis promissis ex  
parte iam satisfecit. Nuperrime enim *Eius* opera  
Tomi II. Sectionem I. in lucem prodiiße, refert  
uniuersalis novorum librorum catalogus Lipsiensis,  
nundinis vernalibus huius ipsius anni destinatus.

7) Plures ex aequalibus GROTIUM *Socinianum*, *Aria-*  
*num*, *Antitrinitarium* et *Atheum* appellare non  
dubitarunt. ABRAHAMVS quidem CALOVIVS, fa-

que exempli, a nostris adhuc hominibus editi, celebritas 9), amissam eius auctoritatem restituere posset. Iam enim omnis interpretandi ratio aliam

mosus ille orthodoxae fidei propugnator, in *epicrisi ad prooemium Grotii in N. T.* p. 1. "Theologiam eius, inquit, mere electivam et vere *ἡγεμονίαν* esse, merito dixeris, nisi quod Atheismus quandoque in ea se prodatur, hæresi quavis peior." Sed iam Buddeo (l. l. p. 1518.) hoc iudicium nimis durum videbatur.

3) Statuit nimirum Io. Cocceius cum affectis, (ut, quae de foederibus divinis eorumque oeconomia, et de aliis rebus somniavit, nunc omittam,) sacrorum auctorum verba, quidquid significare possint, id vere et proprie significare; atque ita non modo omnia allegoriis, vaticiniis, typis et mysteriis ad libidinem replevit, sed certam etiam librorum sacrorum interpretationem penitus sublatum ivit,

9) *Cocceianam* interpretandi rationem nostris adhuc temporibus suos habere fautores et amicos, docent imprimis libri hi: *Neue Sammlung! der mystischen Schriften des Verfassers der mystischen Erklärung üb. das Hohe Lied Salomonis.* Hamburgi et Lipsiae. 1789. 8. IV Tomi. *Des Apostels Johannis Offenbarung Jesu Christi, als das von dem letztern selbst verordnete und von beyden zum Lesen, Hören und Bewahren empfohlne allgemeine Hauptlehrbuch der Religion N. Test. Neu übersetzt von Mag. M. Fr. SEMLER.* Neustadt. ad Oril. et Lips. 1794. 8. *Die Weissagung und ihre Erfüllung aus der heiligen Schrift dargestellt von D. G. Fr. SEILER.* Erlang. 1794. 8.

et laetiores quidem formas induit 10). Certiores nimirum universae arti hermenevticae leges ex acriori et subtiliori classicorum auctorum studio praescriptae sunt, quas deinde in sacris quoque libris explicandis et interpretandis unice sequendas esse, suis quemque sensus suumque iudicium facile docuit 11). Namque cognoverunt viri docti, scriptis sacris, qua originem, auctorum ingenium, stili, aetatis et consilii rationem, accommodationis ad aequalium opiniones prudentiam, et ipsius interpretationis difficultates, eandem aut certe similem cum profanae antiquitatis operibus intercedere sortem; et inde suo iure concluderunt, librorum sacrorum interpretationem, i. e. earum notionum, quas scriptores divini verbis

10) Nonnulla, quae huc pertinent, monuit auctor libelli: *Ueber ältere und neuere Auslegungsart der Bibel. Versuch eines Eklektikers.* Gießae. 1789. 8.

11) Cf. GELBRICHTII *diff. interpretationem librorum divinarum ab interpretatione librorum humanorum nihil differre.* Zizae. 1774. 4. HERDERI *Briefe das Studium der Theologie betreffend.* Part. I. p. 1. sqq. ed. 2. Vinar. 1785. 8. IO. ASBOTH *Comment. de interpretatione Codicis S. ad communia omnes libros interpretandi principia revocata.* Gotting. 1791. 4. GVIL. NIC. FREUDENTHEIL *Comment. de Codice S. more in reliquis antiquitatis libris solenni ingenue interpretando; adiectis difficultatibus Novo Test. propriis.* Gotting. 1791. 8.

suis subiecisse censendi sint, explicationem atque declarationem, quae quidem recte et bene procedere debeat, non aliter institui posse, nisi ut integritate et vera cuiusvis loci lectione constituta, primum ex legibus linguae et loquendi usus, verborum tam singulorum quam iunctorum sensus definiatur 12); deinde vero, quae ita reperta videatur auctoris sententia, ex aetatis suae historia, moribus institutis, ritibus et opinionibus illustretur ac comprobetur 13). Hac enim sola ra-

12) Ea dicitur *grammatica* librorum S. interpretatio, et distinguitur a *dogmatico* interpretandi genere, quod non tam verba accurate explicat, quam sententias utcumque intellectas opinionibus praeiudicatis accommodat. Docte et subtiliter de hac *grammatica* S. S. interpretatione scripsit I. A. ERNESTI in Commentationibus his: *de difficultatibus Novi Test. recte interpretandi*. Lips. 1748. 4. *pro grammatica interpretatione librorum in primis sacrorum*. Lips. 1749. 4. *de vanitate philosophantium in interpretatione librorum S.* Lips. 1750. 4. *de difficultate interpretationis grammaticae Novi Test.* Lips. 1755. 4. *De Origene, interpretationis librorum S. grammaticae auctore*. Lips. 1756. 4. Iunctim hae dissertationes leguntur in Eivs *Opuscc. philol. critic.* Lugd. Batav. 1764. 8. edit. alt. 1776. 8.

13) Haec interpretandi ratio, quae divinatorum auctorum scripta ut res facti spectat, et *historicae* interpretationis nomine venit, ut a grammatica interpretatione nunquam seiungi debet, ita post

tione et communes interpretationis leges servari, et verum atque genuinum scriptorum sacrorum sensum ita erui, ut, quidquid ferior aetas auctorum verbis falso affinixerit, excludatur, recte observatum est. Cum vero literarum sacrarum ea sit natura, ut, quamvis suae aetatis hominibus et accommodata ad temporum illorum ingenium scriptae sint, doctrinam tamen contineant, quae ad nos quoque et ad omnes insequentium aetatum homines pertinet, facile intelligitur, perquam commode liberali horum scriptorum interpreti id peculiare iniunctum esse munus, ut inter veritatem absolute declaratam et inter veritatem pro captu et necessitate temporum adumbratam rite distinguat, atque ita, quae universe valeant, a decretis temporariis et localibus, quae dicuntur, ex certarum legum usu et auctoritate probe seiungat 14). Namque ita demum, et quid sacri scriptores verè docuerint, et quatenus eorum institutio ad nos pertineat, recte iudicabitur.

SEMLERVM inprimis a C. A. TH. KEILIO definita est et commendata in dissert. *de historica librorum sacrorum interpretatione eiusque necessitate*. Lipsiae. 1788. 4. quam vernaculo stilo redidit C. A. HEMPEL. Lipsiae 1793. 8.

- 14) Cf. TR. A. SEYFFARTHI *Comment. de locis N. T. communibus rite constituendis*. Lips. 1789. 4. ECKERMANNI *Praefat. ad Compendium Theolog. Christ. theoret.* Kiliae. 1791. 8. EIVSDEM *Theo-*

Quae cum ita sint, quis tandem non laetetur, omnes bonae notae interpretes, quotquot hac nostra aetate in explicandis et illustrandis libris sacris versati sint, eandem, quam leviter perstrinxi, rationem secutos esse, et adhuc sequi? Quis sibi non gratuletur fructus uberrimos et saluberrimos, qui ex tali literarum sacrarum usu et tractatione non possint non ad universam rem christianam prodire et enasci? At vero quis idem non doleat, certam aliquam omniumque consensu probatam legem adhuc desiderari, ad quam, tanquam lapidem Lydium, exigere possimus atque explorare, quid sacri auctores suae tantum aetati scripserint, et quid nobis? quae universa sint, et quae certo tempori ac populo debeantur? uno verbo, qualis librorum sacrorum usus *nostrorum* temporum rationibus conveniat? Multos quidem multa hac de re scripsisse 15) me non fugit; sed confi-

*log. Beytr.* Vol. II. Part. II. et omnium instar EICHHORNII *Vorschläge zur Hermeneutik*; in *J. Biblioth. d. bibl. Literat.* T. IV. p. 330. sqq.

- 15) Pertinent huc *primum* scripta eorum, qui de *accommodatione* doctorum sacrorum ad popularium captum et opiniones egerunt. Notavit ea maximam partem C. H. L. POELITZ in *Comment. de gravissimis theologiae seriorum Iudaeorum decretis.* Lips. 1794. 4. p. 15. nota 21. Deinde consulendi sunt ii, qui primam religionis Christianae formam ad nostri seculi rationes revocare studuerunt: SEMLER, (variis librorum suorum locis,) GVIL.

liorum et sententiarum aequalitatem frustra circumspicio. Quot capita, tot sensus, suam quisque sequitur rationem, aliorum mentibus nonnunquam e diametro oppositam. Studium omnibus commune, sed diversae viae, diversus denique finis; lex summa, quae studiorum cursum dirigat omniumque plausum tulerit, nulla. Hanc autem opinionum diversitatem et animorum fluctuationem, hunc ingeniorum dissensum in re tam gravi, quae librorum sacrorum auctoritatem et usum decernit, quis est, qui aequo ferat animo? Quis certi finis, ad quem omnis scriptorum divinorum interpretatio referatur, exactam descriptio-

ABR. TELLER, (*Vorerinnerungen zur 3ten Aufl. f. Wörterbuchs des N. T.* Berol. 1780. 8. tum *Excurs. II. ad BURNETI de fide et officiis Christianorum librum.* Halae 1786. 8. p. 243. sqq. denique libello huic disquisitioni proprie destinato: *die Religion der Vollkommenen.* Berol. 1792. 8. OCKEL, (*Ueber Tellers Religion der Vollkommenen.* Berol. 1794. 8.) MAREZOLL, (*Ueber d. Bestimmung des Kanzelredners.* Lips. 1793. 8. Cap. I.) Auctor libri: *Briefe über d. Perfectibilität der geoffenbarten Religion.* Ienae et Lipsiae 1795. 8. SENTENIS, (*Beiträge zur Verwandlung der Sittenlehre des Urchristenthums in eine Sittenlehre für unser Zeitalter.* Servestae. 1795. 8.) alii, quos, ne longior sim, nunc omitto. Varias horum Virorum doctissimorum et celeberrimorum sententias recensere atque examinare, non est huius loci ac temporis. Notasse dissensum eiusque causas, nunc sufficit.



nem non optet? et quis, si recte ea instituta fuerit, auctori eius non laudes habeat et gratias?

Nuper IMMANUELEM KANTIUM, Virum incomparabilem et ab optimo quoque maxima animi pietate colendum, de hac re cogitasse, sententiamque suam de summa interpretationis librorum sacrorum lege, quae practicae rationis fundamento niteretur, publice proposuisse 16), vel sola controversiae inde enatae fama in omnium notitiam pertulit. Ut enim primum venerabilis Senex mentis suae cogitata cum eruditorum hominum orbe communicaverat, permulti exstiterunt, iique et ab eruditionis laude et a nominis celebritate spectatissimi Viri, qui aut assensum et commendationem significarent 17), aut improba-

16) In libro: *die Religion innerhalb der Grenzen der bloßen Vernunft*. Regiomont. 1793. 8. Cap. III. Sect. VI. p. 149. sqq. edit. 2. 1794. p. 158. sqq.

17) His adnumerandi sunt: AMMON., (*Neues theologisches Journal*. Herausgegeben von H. C. A. Hänlein u. C. F. Ammon. Vol. I. p. 442. sq. nota c. Vol. II. p. 437. sqq. 477. sqq. Vol. III. p. 252. sqq. 491. sqq.) SCHAUMANN, (*Philosophie der Religion überhaupt u. des Christl. Glaubens insbesondre*. Hal. 1793. 8. Cap. III. Sect. II. §. 325. 326. p. 190. sqq.) TIEFTRUNK, (*Ueber die Auslegungsarten der in der Heil. Schrift geoffenbarten Religionslehren*. Vor dem 2ten Th. der Censur des Christl. Protestantischen Lehrbegriffs. Berol. 1794. 8.

tionis et vituperationis necessitatem fuaderent 18). Hinc ortum est magnum animorum dissidium.

OCKEL, (in libro nota 15, laud. p. 33. sqq. nota \*) *Autor anonymus* Comment. vernaculae: *Ueber den prattischen Sinn religiöser Urkunden; von einem Unpartheyischen; im N. theolog. Journal.* Vol. III. p. 461. sqq. Alius anonymus vir doctus, (Ibidem. Vol. IV. p. 208. sq.) POELITZ, (*Kritik der Religionsphilosophie und Exegese unsers Zeitalters.* p. 392. sqq.) G. S. FRANCKE, (*de ratione, qua est critica philosophia ad interpretationem librorum, inprimis sacrorum disputatiuncula.* Schlesvici. 1794. 8. iterum typis exscripta in *Neues Magazin für Schullehrer.* Herausgegeben von G. A. Ruperti u. H. Schlichthorst. T. III. P. II. Bremae. 1795. 8. p. 76. sqq.) Censor I. G. ROSENMÜLLER *Observationum* mox laudandarum in *d. Jen. Allgem. Liter. Zeitung.* a. 1794. no. 196. p. 689—691. Censor libri Kantiani in *d. Götting. Anzeigen von gelehrten Sachen.* a. 1793. p. 1531. — A. nonnullis adversariorum criminationibus Kantianam interpretandi rationem defendere et veram eius indolem accuratius describere studuerunt: Censor libri Kantiani in *der Götting. Biblioth. der neuesten theologischen Literatur,* herausgegeben von I. F. Schleusner und C. F. Stündlin. T. I. P. I. (1794. 8.) p. 47. sq. et PLANCKIUS in *f. Einleitung in die theolog. Wissenschaften,* Vol. II. p. 141. sqq. — Specimina interpretationis S. S. ex Kantii ratione dedit C. W. PENZENKVEFFER, Norimbergensis, (*Ueber einige Stellen im N. T. nach Kantischer Erklärungsmethode;* in *HENKII Magazin* Vol. III. p. 379. sqq.) simulque maioris molis opus, quod copiosius hoc argumentum tractaret, promisit.

quod, ut solet, doctam controversiam et concertationem comitem habuit. *Horum* enim alii ve-

- 18) Quo pertinent hi: EICHHORN, (*Briefe die biblische Exegese betreffend*; in *J. Biblioth. der bibl. Liter.* T. V. p. 203. sqq. *Ueber die Kantische Hermeneutik.* Ibid. T. VI. p. 55. sqq.) ROSENMÜLLER, (*Commentt. de fatis interpretationis Sacr. literarum in ecclesia Christ.* Part. VII. et VIII. ubi inest *Excursus de nova Kantii S. S. interpretandi ratione.* Lips. 1793. 1794. 4. *Einige Bemerkungen das Studium der Theologie betreffend. Zweyte vermehrte Ausgabe. Nebst einer Abhandlung über einige Aeussierungen des Hrn. Prof. Kant, die Auslegung der Bibel betreffend.* Erlang. 1794. 8.) GABLER, (*Vorrede zu des 2ten Theils 2tem Bande von J. Ausgabe der Eichhornischen Urgeschichte.* Norimberg. 1793. 8. p. 14.) NIEMEYER, (*Vorrede zur zweyten Ausg. J. popul. und practisch. Theologie.* Halae 1794. 8.) HAMMER, (*Differt. Mortuorum in vitam revocatio sermonibus Christi historicae interpretationis ope vindicata.* Lips. 1794. 4. p. 25. sqq.) ECKERMANN, (*Theolog. Beytr.* Vol. IV. Part. I. p. 31. sqq. 247. sqq. cl. Vol. III. Part. II. p. 189. sqq.) Auctor Anonymus, (*Ein Paar Worte über die Kantische Schriftauslegung*; in HENKII *Magazin.* Vol. II. p. 623. sqq.) Acutissimus Auctor libri: *Briefe über die Perfektibilität der geoffenbarten Religion.* Epist. XII. p. 246. sqq. *Censor Observatt.* ROSENMÜLLERI, in *d. Oberdeutsch. Litter. Zeit.* a. 1794. no. 71. p. 1169. sqq. HASENKAMP, (*Annalen der neuest. theolog. Literat. und Kirchengeschichte.* T. VI. 1794. p. 824. sq.) CH, D. BECK, (*Observatt. critico-exegeticae.* Lips.

ram interpretationis notionem *Kantium* aut nescire aut consulto pervertere statuebant; aliis idem scriptorum divinorum argumentum cum mythologicarum fabellarum ineptiis aequasse videbatur; rursus alii, admissis *Kantii* praeceptis, allegoricam et mysticam libros sacros interpretandi rationem revocari opinabantur; alii denique, ne ingenuae rationis nostrae libertati, quae eadem cum severitate aliena decreta repudiet, ac suis tantum legibus adstringi se patiatur, et in universum puriori veritatis cognitioni iuvandae et propagandae iniusti a *Kantio* limites constituerentur, verendum esse existimabant. Quibus *illi* ita responderunt, ut vel *Kantii* mentem ab adversariis suis recte exceptam esse atque examinatam negarent, vel novae interpretationis virtutes ante oculos ponere et vindicare studerent. Grammatica enim et historica sacrarum literarum interpreta-

1795. 4. p. 14. sqq.) *Censor* disputat. *Franchianae* nota super. citatae, in *d. Jen. Allg. Liter. Zeit.* a. 1795. no. 78. p. 623. sq. *Censor* libri *Kantiani*, in *der Revision kritischer Journale u. Zeitungen.* T. I. Partic. II. (Berolin. 1795. 8.) p. 126. sqq. Subtilissimus *Auctor* libri: *Einige Bemerkungen über Kants philosophische Religionslehre.* Kiliae 1795. 8. p. 119. sqq. cl. *N. allgem. deutsche Biblioth.* T. XVI. P. I. p. 152. sqq. et M. AVG. CHRIST. STAUSS in *Dissert. Utrum philosophica Scripturae interpretatio, quam commendavit Kantius, admitti possit in explicando N. T. Vitemb.* 1795. 4.

tione nequaquam omnia confici absolviq̃ue iudicaverunt, quippe qua tantum, quid divini doctores *ſuis* temporibus ſcripſerint, demonſtretur, non vero, qualis unde ad *nos* redundet animi obligatio, definiatur; aliud igitur bono interpreti adhuc in-  
iungi debere officium, idque primarium, quod *Kantius* demum notaverit et recte deſcripſerit, ſtatuerunt.

Peccatum eſt, quantum video, ab utraque parte 19); nec hoc mirum, cum eam conſitet communem fere ſortem eſſe omnium inter ſcriptores controverſiarum, ut in fervore diſputandi quaedam minus recte capiantur, proponantur, examinentur, defendantur. Quam ipſam ob cauſam, qui animo ab omni cupiditate alieno peccata notet et corrigat, recte et ſubtiliter monita ex utriusque partis diſputationibus in communem uſum excerpat, atque adeo, detectis erroribus et remota impedimentorum mole, animos mirum quantum diſſidentes ſibi et literis reconciliare ſtudeat, eum eſſe operae pretium facturum, perſuaſum habeo. Haec certe fuit commentationis huius origo, hoc conſilium; et quamvis vix ſperare audeo, ſtudium meum alterutri parti omnino probatum iri, acquieſcere tamen licet in

19 Conſentit AMMON, in *N. theolog. Journ.* Vol IV. p. 400.

ingenuo veritatis amore <sup>20)</sup>, propositi honestate, mentisque integrae conscientia.

*Quare et quomodo* KANTIVS vulgarem nostrisque hominibus plerisque omnibus probatam librorum sacrorum interpretationem mutari voverit, ut primum omnium paucis exponamus, res ipsa et instituti nostri ratio postulat. Omnis autem summi Philosophi disputatio ita fere habet: „*Varia sunt fidei religiosae genera, sed una tantum (vera) religio cogitari potest*, (p. 146. ed. I.) *eaque moralis, quae practicae rationis fundamento superstructa sit*, (p. 139.) *et in agnoscendis atque exsequendis officiis nostris, ta quam praeceptis divinis, cernatur*. (p. 215. 150.) *Quam ut puram ab alienis decretis et arbitrariis praescriptis conservemus, ratio ipsa suadet, quippe quae suis tantum legibus adstringi vult ac debet*. (p. 140.) *Cum autem maior pars hominum ea laboret ingenii imbecillitate, ut in hac rationali fide, quam debita legi morali obedientia gignit, acquie-*

20) Eo quidem, quem nuper acuti ingenii philosophus egregie adumbravit, in comment. vernac. *Ueber Belebung und Erhöhung des reinen Interesses für Wahrheit; in den Horen. T. I. P. I. p. 79. sqq. Tubing. 1795. 8.* „Dem reinen Interesse für Wahrheit ist es um die bloße *Form*, nicht um den *bestimmten Inhalt* der Sätze zu thun.“ Haec summa est.

quiescere non valeat (p. 137.), sed aliud adhuc fidei suae fundamentum requirat, quod sensus feriatet divina communitum sit auctoritate (p. 149.), cumque in primis tunc, ubi homines in religiosos coetus publice coeant, haec ingeniorum tenuitas spectari debeat (p. 141.); communis cuiusdam normae, quae publicum numinis cultum constituat (p. 141.) et verae religioni iuvandae atque propagandae, adminiculi loco, inserviat (p. 144.), legis instar proponendae necessitas in unaquaque societate morali facile intelligitur. Neque diu haesitabimus, qualem credendi agendique normam, ad quam omnis populi institutio revocetur, sanciamus, cum fere semper iam adsit Codex quidam Sacer, quem vulgi opinio, cum ob antiquitatem tum propter divinam originem, humanis libris omnibus longe anteponit, et in quo Dei ipsius voluntatem descriptam iudicat. Hunc igitur retinebimus, eoque melius consilio nostro respondere existimabimus, quo plenius ac purius, paucis tantum mere arbitrariis aut historicis decretis admistis, veram de morali religione doctrinam continet (p. 145.). Iam ut verae religionis exercitatio huius Sacri Codicis instrumento recte iuветur, ut leges arbitrariae et dogmata inutilia, quae ex humanorum scriptorum ingenio bonis ac divinis decretis fere semper admista leguntur, oblivioni sensim tradantur et antiquentur, utque adeo fides historica et empirica, sola auctoritate in-

nixa, morali fidei paulatim cedat, opus est *practica* sive *moralis* librorum sacrorum interpretatione, h. e. ea, quae auctorum divinorum verbis omnino tribuat sensum, qui cum rationis practicae notionibus ac decretis optime conveniat, si vel ille sensus non videatur ex verborum ac formularum natura et contextu proprie existere, dummodo in se admitti atque tolerari possit, et hac *sola* ratione omnis profanorum atque impiorum dictorum species excludatur (p. 149. sq.).“ Haec ille.

Quaeritur nunc, quid sit de hac *moralis* literarum sacrarum interpretatione iudicandum? *num* et *quatenus* probari possit? an vero debeat omnino repudiari? Sed antequam huic disquisitioni vacare licet, primum omnium, quid *Kantius* ipse in proponenda hac summa scriptorum divinorum interpretandorum lege vere cogitaverit, et quomodo intelligi eam voluerit, breviter erit expediendum. Nam de hac quoque primaria quaestione non eadem est virorum doctorum sententia; neque poterit, nisi statu controversiae accurate definito, omnis causa recte iudicari.

Duplici nimirum sensu hermenevtica *Kantii* regula intelligi potest, et vero fuit intellecta. *Aut* enim significabit: omnia Codicis Sacri dicta, quae ad religionem pertinere putentur, ad sensum, qui cum rationis practicae notionibus con-



spiret, ita revocanda esse, ut, ubi non inest sensus moralis, v. c. in historicis et arbitrariis decretis, sola auctoritate innixis, detorqueantur verba, et sententia purior, neglecto grammatico et historico sensu, atque invito orationis contextu, inferatur 21). Aut ita capi potest, ut de sensu scriptoris menti alieno plane non cogitetur, sed, quae absoluta grammatica et historica interpretatione, universa sint et rationis excultae iudicio probentur, ea in communem usum excerpantur, quae autem contra videantur, una cum orationis et sententiarum involucris atque integumentis, aetati suae suoque populo relinquantur 22).

B 2

21) Ita *Kantium* intellēxerunt: *Eichhorn*, *Rosenmüller*, *Eckermann*, *Tieftrunk*, scriptor anonymus in *N. theol. Journ.* Voll. III. p. 461. sqq. *Penzenkuffer*, alii.

22) Hanc fere *Kantii* mentem esse statuerunt, aut potius, hoc sensu *moralem* interpretationem sumi voluerunt: *Anmon*, *Poelitz*, *Francke*. Caeterum illi Duumviri, quos primo loco nominavi, sensus alieni scriptorum divinatorum verbis *adnectendi* necessitatem coram concione defendunt (de quo infra); hic autem probare studet, a philosophia critica grammaticae librorum cum profanorum tum sacrorum interpretationi nullum imminere periculum, cum *Kantii* consilium eo tantum pertinuerit, ut quaedam certa norma praescriberetur, ad quam, tamquam lapidem Lydium, quaecunque unquam sive a philosophis sive a popularibus scriptoribus dicta sint et prolata, exigi possint ac debeant.

Utra igitur explicatio verum *Kantianorum* dictorum sensum reddet? utram genuinam putabimus? Prior, ex meo quidem iudicio, aut omnino locum habet, aut certe a vero propius abesse censeretur debet. Hanc enim, opinor, quicumque omnem *Kantii* librum attente et sine partium studio perlegerit, tam ex ipso praeceptorum *Kantianorum* ingenio, quam ex perpetua auctoris consuetudine, librorum sacrorum effata in alienum sensum detorquendi, naturali et logica consecutione existere indicabit. Aperte nimirum *Kantius* morali sive practico sacrarum literarum interpreti licere inquit, puriorem sententiam ubicunque fieri possit, substituere, si vel vis fiat doctorum divinorum verbis (p. 150.); neque ipsi quaerendum esse, utrum sensus ille sublimior atque purior scriptoris menti obversatus fuerit, an vero eius verbis ex arbitrio inferatur, dummodo in se ac sine omni historica probatione verus sit, et ad moralem hominum emendationem conducat (p. 43. nota \*). Illustrat deinde hanc interpretandi rationem exemplo cum antiquiorum tum recentiorum populi doctorum inter varias gentes, qui similiter libros suos sacros ita tractaverint et explicuerint, ut omni sententiarum impietate remota verior ac purior sensus prodiret (p. 150.). Quid vero haec exempla aliud illustrare possint, quam hoc: licere publico religionis doctori alium, quam qui grammatice existat, sensum scriptorum divinorum verbis affingere, equidem non video.

Denique cum unusquisque verborum suorum optimus sit interpres, facile intelligitur, quem sacrorum dictorum usum *Kantius* per totum librum ipso facto exprefferit et designaverit, eum ista quoque interpretationis lege commendari debuisse atque significari. Iam ubique fere proprius verborum sensus a *Kantio* negligitur, alieno in eius locum substituto. Evolvat, cui haec ignota sint, pag. 44. 67. sqq. 168. 194. 228. ed. I. et pag. 158. ed. 2. atque vera me dixisse confitebitur.

Pater igitur ex his omnibus, unicum *Kantii* consilium in promulganda practicae interpretationis lege eo spectare, ut, quae Sacri Codicis dicta mere historici sint argumenti, et neque ad veram religionem pertineant, neque moralem animorum emendationem iuvare possint, verbis quidem retineantur, ne omnis librorum sacrorum honor atque auctoritas cadat, sensu autem omnino atque ita mutantur, ut cum rationis practicae notionibus et decretis conveniant. Hinc recte colligitur, qui *Kantium* in interpretando propriam verborum significationem nihil curare insimularunt, melius eius mentem cepisse, quam qui contra disputarunt. Sed erant a Kantianae interpretationis adversariis, antequam de omni hac re iudicium ferretur, ea quoque diligenter ponderanda, quae Auctor ipse sententiae suae illustrandae causa passim monuit, et de quibus nunc eo lubentius dicemus, quo magis et *Kantium* ab iniustis nonnullis

rum criminationibus vindicabunt, et iudicium nostrum de universa causa rectius informabunt.

Primum quidem *illustris* KANTIUS monet, nolle se suam libros sacros tractandi rationem pro vera atque propria *interpretatione* haberi, quippe quam rationis philosophantis fines excludant, qui eo tantum utque perineant, ut, quemnam liceat *usum moralem* ex singulis Sacri Codicis locis elicere, doceatur atque decernatur (p. 43. nota \*). Deinde idem adiungit, eam interpretationem, quae variis doctrinae copiis et iusta linguarum scientia nitatur, neutiquam a se sperni aut turbari (p. 221.); quamquam illam practicae interpretationi postponendam iudicet (p. 153.). Denique tantum abest, ut *Kantius* de vera eruditione et docta linguarum intelligentia detrahat, ut potius cum ad probandam et vindicandam historicam sacrorum librorum fidem, tum ad grammaticam eorum interpretationem iuvandam, huius adiuventi necessitatem ipse agnoscat et tueatur (p. 153 sqq.). Caeterum non licere solum, sed nostri etiam officii rationes postulare, ut moralem dictis sacris tribuamus sensum, iudicat *Kantius* (p. 106.); dummodo ne purior ille sensus ipsorum auctorum menti falso obtrudatur, sed omnis haec de vera atque genuina doctorum divinorum sententia quaestio in medio relinquatur (p. 152.).

Poterunt iam, universa Kantianae interpretationis ratione adumbrata, quae *minus commode*

ab adversariis prolata et opposita videantur, facili negotio notari ac corrigi. Et primum quidem, qui *Kantium* ad communia hermenevtica praecepta et ad ipsam interpretationis notionem delegabant, eos omne oleum atque operam perdidisse, facile intelligitur. Quasi enim sagacissimus philosophus, quid sit interpretari, nesciat! et quasi non sua sponte pateat, *Kantium* duntaxat *moralem* librorum sacrorum *usum*, non interpretationis, quae proprie dicitur, artem docere voluisse et commendare! communes hermenevticas leges probe novit *Kantius*, et in ipsa interpretatione servari iubet; sed cum nunc de hac prorsus non quaeratur, ex illis quoque rem non posse iudicari apparet.

Allegoricam et mysticam libros sacros interpretandi rationem a *Kantio* revocari et instaurari, queruntur alii; sed aequo h. e. nullo iure. Partim enim, ut iam dixi, *Kantius* de interpretatione omnino non loquitur, nec, ubi eius mentionem facit, nisi grammaticae et historice hanc institui debere, claris verbis significat. Qui ergo allegoricae interpretationis instaurator recte haberi potest? Partim vero ipsa libros sacros tractandi methodus, quam allegoriarum sectatores et patroni praecipunt, a Kantiana ratione toto coelo distat. Illi vanos ingenii lusus sequuntur, hic certa rationis decreta; illi suam sententiam auctori ipsi obtrudunt, hic fieri illud vetat; illi sensum verborum in infinitum multiplicant, hic unum li-

teralem defendit, quamquam eum ubique doceri nolit; et quae sunt talia plura.

Porro ne, admissis *Kantii* praeceptis, nova subtili linguarum intelligentiae barbaries inducatur, omnisque vera eruditio inter Theologos contemnatur et despiciatur, verentur adversarii. Cum enim, inquiunt, ad *moralem* sive *practicam* scriptorum divinorum interpretationem, quae sola, ex *Kantii* opinione, communi saluti inserviat, non opus sit multa doctrina et varia literarum suppellectile, sed unicus sensus moralis sufficiat; quid tandem publici religionis doctores et divinae voluntatis interpretes ingratam linguarum discendarum molestiam amplius suscipiant? quid ea curent, quae nihil sibi aliisque prodesse sciant? quidni potius omne verae eruditionis studium missum faciant et exsecrentur? Habent ea, fateor, magnam veri speciem, sed tamen est species, quae statim evanescit, si res diligentius ponderatur. Scilicet non potest moralis interpretatio cogitari, nisi grammatica et historica praecefferit. Quid verba proprie significant, et quae sit vera auctoris sententia, constitui debet ante, quam, quem *moralem* sensum admittat oratio, quaerere licet. Ita certè fieri vult *Kantius*, idemque eius amici (maximam certe partem) uno ore repetunt. Ille nimirum practico interpreti adiungit eruditum sacrarum literarum investigatorem, qui sit varia linguarum scientia instructus, artis criticae gna-

rus, et in multiplici terrarum atque populorum historia versatus, qui mores, philosophiam, opiniones, instituta, ritus omnemque culturam antiquarum gentium probe noverit, et cui duplex munus assignari debeat, ut et, quae ad originem, integritatem, fidem et auctoritatem librorum sacrorum pertineant, scrutetur, idoneisque argumentis certos disquisitioni suae fructus demonstraret, et veram doctorum divinorum sententiam singulis locis grammaticae et historice expediat. Hanc *eruditi* interpretis operam excipiet, ex *Kantii* sententia, *practici* interpretis studium examinantis atque definientis, quae Sacri Codicis dicta moralem sensum admittant, quae non, et qualis sensus singulis locis optime tribui possit. Ut igitur, quae sint *eruditi* et quae *practici* interpretis partes, et quod utrisque intercedat necessitudinis vinculum, ex his *Kantii* verbis recte cognoscitur, ita facile etiam patet, quantopere fallantur, qui ex Kantiana libros S. tractandi ratione novam barbariem et linguarum incitiam omnisque verae eruditionis contemptum metuere videntur. *Kantius* certe huius infausae praesagitionis auctor suusque recte haberi nequit, cum grammatica et historica sacrarum literarum interpretatio, ad quam rite instituendam larga doctrinae copia opus est, ab ipso non modo non turbetur et spernatur, sed morali etiam interpretationi fundamenti loco inservire iudicetur.

Ad oppositiones, quibus Kantiana librorum S. tractatio *minus commode* impugnari videtur, ea quoque pertinet, quod sic omnis scripturae S. fides cum mythologicarum fabularum ineptiis aequetur. Tantum enim abest, ut *Kantius* usquam veram divinamque religionis doctrinam in Codice christianorum Sacro contineri negaverit, adeoque omnia eius loca, si moralis inde usus deduci debeat, primum in alienum sensum detorquenda esse iudicaverit, ut potius ipse egregium praeceptorum christianorum cum rationis practicae decretis consensum singulari quodam operis sui capite demonstrare studuerit. Interim multa quoque, quae ad moralem animorum emendationem nihil faciant, bonis illis decretis admista esse, idem iudicavit; hancque ipsam ob causam, ut nimirum, quae nostris de vera religione notionibus non convenirent, sensim oblivioni traderentur, promulgavit legem suam de *moralis* sive *practica* sacrarum literarum interpretatione. Itaque *Kantius* neque de doctrinae christianae auctoritate et excellentia detraxisse, neque scripturae S. fidem impugnasse et cum mythologicarum fabularum ineptiis aequasse recte poterit infimulari.

Sunt alia adhuc, quae Kantianae libros S. tractandi methodo paulo iniquius opposita videantur. Sed nolo in his repetendis et corrigendis longius versari, partim ne iusto prolixior fiat



omnis haec disputatio, partim ne in notandis eorum, quos caeteroquin summa animi pietate colo ac veneror, Virorum peccatis mihi ipse placere videar, quae quidem iuvenilis ingenii temeritas recte habetur dementissima. Illud potius nunc agam, quod instituti mei ratio postulat, ut nimirum, et quae mea sit animi sententia quodque iudicium de Kantiana, qualem supra descripsi, librorum S. tractatione, et quae ex aliorum monitis mihi probentur, in publicum proferam. Ut autem omnis disputatio ordine suo procedat, ipsum *Kantium* sequemur, et primum fundamenta suae interpretationis, deinde ipsam legem severo neque cupido iudicio subiiciemus.

Iam illud quidem dubio caret, et lubentissime a nobis conceditur, veram religionem cogitari non posse, nisi quae communibus summae legis moralis postulatis satisfaciat, sitque adeo necessariis et immutabilibus rationis nostrae notionibus atque decretis superstructa 23). Cum enim maxima hominum prae reliquis animantibus praestantia in rationis facultate et usu insit, cum omne

23) Cf. TIEFTRUNK *Versuch einer Kritik der Religion und aller religiösen Dogmatik, mit besonderer Rücksicht auf das Christenthum*. Berol. 1790. 8. p. 99. sqq. et EIUDEM *Censur des Christl. Protestant. Lehrbegriffs*. T. I. p. 138. sqq.

veri ac falsi, boni et mali, iusti pravique discrimen a rationis indicio pendeat, cum neque humanae naturae dignitatem tueri et provehere, neque ad maiorem cum summo numine similitudinem contendere possimus, nisi diligenti rationis nostrae cultura et assiduo eius praeceptis obediendi studio; qui tandem purior ac verior religio existat, quam si tota ad sanae rationis dictata componatur? qui sublimior dei cultus, quam ex accurata legum suarum, quas non tabulis publicis sed unuscuiusque menti atque animo impressit, et investigatione et reverentia? Eximia huius purioris religionis dignitas in eo inprimis cernitur, ut omnis caeca fides, omnis alieni arbitrii et exempli auctoritas, omnis in agendo stimulorum prae-  
 vitas, omnis obscuritas et repugnantia in ipsis religionis placitis et institutis, omnis denique sacram-  
 rum ineptiarum vis excludatur; contra nihil in praeceptorum divinorum, fidei ingenuitate agnoscendorum et vitae probitate exprimendorum, numero habeatur, nisi quod verum sit, et intelligatur, et rationis iudicio probetur. Ut igitur vera religio rationis practicae fundamento unice innititur, et neque mentis nostrae captum superare, neque certis sanae rationis praeceptis contradicere debet; ita facile etiam patet, quamvis supremum in causa religionis iudicium rationis practicae et summae legis moralis tribunali concedatur ac vindicetur, neutiquam tamen *revelatae* religionis fi-

dem eo impugnari, aut de vero eius pretio detrabi, sed tantum exactam quandam normam praescribi atque constitui, ad quam, tanquam lapidem Lydium omnis revelationis, in facto positae, veritas et divina origo exploretur 24). Cum nimirum deum, qui aeternas illas ac necessarias veri et recti leges animo nostro ita insculpsit, ut nos vel invitos earum auctoritatem revereri oporteat, secum ipsum pugnantem cogitare absurdum sit, optimo cum iure, quidquid contra illas leges et certa sanae rationis decreta offendat, id omne

- 24) Vid. *Predigten zur Beförderung eines freyen und vernünft. Denkens in d. Religion*. T. II. Ueber die Rechte der Vernunft in d. Relig. Gorlicii. 1795. 8. et ZIEGLER *Vernunft- und Schriftmäßige Erörterung, dass der Beweis für die Wahrheit und Göttlichkeit der Christl. Religion mehr aus der innern Vortreflichkeit der Lehre, als aus Wundern und Weissagungen zu führen ist*; in HENKII Magazin. T. I. P. I. p. 20. sqq. Ad calcem disputationis (p. 91.) haec universa sententia proponitur: „Nur die grösste Summe reiner Wahrheit und der göttliche Gehalt einer geoffenbarten Lehre kann für die Wahrheit und Göttlichkeit der Offenbarung selbst entscheiden.“ Conferri quoque possunt, quae monuerunt: *Auctor Comment. Etwas zur Kritik der bisherigen Dogmatik*; in HENKII Magazin T. I. P. III. p. 379. sqq. et NOESSELTUS in *f. Anweisung zur Bildung angehender Theologen*. T. II. §. 156. 157. p. 229. sqq. ed. 2. Halae. 1791. 8.

non a revelatione divina ortum suum duxisse, neque adeo verae religionis praeceptis recte adnumerari posse, defenditur. Hinc etiam iudicari potest, quam male *revelata* et *rationalis* seu philosophica religio sibi opponantur, cum tantummodo fontis, non item argumenti et consilii ratione differant 25). Revelata scilicet religio, quippe cum rudiorum hominum ingenio ac necessitatibus subvenire et accommodari debuerit, quae docet et praecipit, fere semper ad auctoritatem et nutum divinum revocat; philosophica contra non nisi a certis et exploratis sanae rationis decretis omnem suam doctrinam repetit atque derivat. Ea igitur sola esse revelatae et rationalis religionis differentia videtur, quae vero ipsa non adeo magni est momenti, et praeterea etiam successu temporis atque aucta ingeniorum humanorum cultura certo quodam sensu prorsus evanescit. „Quo enim magis emergunt homines, inquit *vennerandus* HENKIUUS 26), eo minus pondus illis „habet vel in cogitando vel agendo auctoritas

25) Cf. FICHTE *Kritik aller Offenbarung*. ed. 2. Regiomont. 1793. 8. in primis §. 4. p. 71. sqq. et §. 11. p. 163. sqq.

26) *Lineamenta institutionum fidei Christianae historico-criticarum*; auctore HENR. PHIL. CONR. HENKE. ed. 1. Helmstad. 1793. 8. §. 2. p. 3.

„aliorum, iique, qui sibi ipsi verum et rectum re-  
 „periendi vindicant facultatem et libertatem,  
 „omnem sensum abiiciunt arbitrii et exempli  
 „alieni reverentiam, nisi intelligant simul illius  
 „cum suis ipsorum iudiciis et institutis concor-  
 „diam. *Hinc et omnis revelata religio paulatim in*  
 „*rationalem transit*, et eo eniti potest homo, ut  
 „alienae institutioni non amplius fontis, sed ca-  
 „nalis, non lucis, sed lucernae, beneficium tri-  
 „buat, quo, quas ipse iam sua opera exploratas  
 „habet notitias, facilius ac maturius ad ipsum  
 „deductae sunt.“ Atque ita eo tandem perveni-  
 tur, ut in causa religionis non, *quid* scriptum,  
 sed *quare* et *quam vere* aliquid scriptum sit, quae-  
 ratur, ut singulorum dogmatum fides et auctori-  
 tas non ad literam scriptam, sed ad necessaria sa-  
 nae rationis decreta et notiones exigatur, utque  
 adeo omnis animi obligatio non ex eo existere iu-  
 dicetur, quod hoc vel illud scriptum sit, sed quod  
 lex summa morum ita fieri iubeat, et ratio dei  
 ipsius voluntatem ita recte exprimi intelligat.

Cum igitur *Kantii* sententia: verae religio-  
 nis nomen ad eum tantum summi Numinis cul-  
 tum pertinere, qui totus sit ad summa rationis no-  
 strae praecepta compositus: omnino valeat, five  
 prima huius religionis notitia ex institutione aliena  
 et divina revelatione, five ex propria homini co-  
 gitandi virtute, derivetur; non potest non uni-

cuique planum esse atque perspicuum, primum publicorum religionis doctorum officium eo contineri, ut singuli in hac puriore religione iuvanda, propaganda et ab alienis additamentis ac depravationibus purganda, pro virili elaborent. Neque poterit vel a rei ipsius difficultate, vel ab impedimentorum mole atque pertinacia, vel a dubio studiorum eventu idonea omitti laboris causa deduci. Ubi enim semel quis officii necessitatem intellexerit, ei non amplius licet quaerere, utrum difficile sit negotium, et molestum, et offensivum atque invidiae plenum, utrum laetus rei eventus sperari possit, an vero ingratus et adversus. Haec talia curare et anxie quaerere, ipsa officii notio vetat. Praeterea non est, quod de fausto operis nostri, de quo nunc loquimur, successu nimis solliciti simus et timeamus, cum rara temporum et hominum nostrorum felicitas hoc nostrum studium, dummodo sapientia et circumspectione regatur, egregie sublevare videatur. Illa enim iam dudum praeterierunt tempora, quibus omnem circa receptam religionis formulam meditationem ac philosophiam cane pelus et angue vitari, omnem de quocunque systematis theologici capite dubitationem pro certissimo summae impietatis indicio haberi, omnemque rationis usum in causa fidei aut omnino cessare, aut ad insana maiorum decreta stabilienda et confirmanda componi, voluit vulgaris hominum opinio; nec unquam

haec temporum barbaries redibit, quidquid superstitionis et male sanae pietatis patroni atque fautores contra nitantur. Namque saniores ac puriores religionis notitiae iam usquequaque sparsae sunt, et ex singulis hominum ordinibus ingenuae veritatis regno innumeri cives melioris doctrinae atque institutionis ope accesserunt; liberalius philosophiae studium iura rationis nostrae aeterna ita et detexit et vindicavit, ut vel illi, quorum interest inveteratam patrum fidem tueri, manifestam cum exploratis sanae rationis decretis dissensionem, quae vulgo crimini ipsis datur, a se suisque opinionibus omni modo defendere atque propulsare studeant, nec detestandum illud *Tertulliani* placitum: *credo, quia impossibile est, credo, quia absurdum est*: ulli hominum, nisi fanaticae *Lavaterianorum* nonnullorum turbae probetur. Hinc temporis nostri felicitas, quippe puriori religioni stabiliendae et propagandae favens, recte celebratur;

Pergit *Kantius* hunc fere in modum: „ut vera religio, de qua iam convenimus, inter homines rite fundetur, et altiores in dies radices in eorum animis agat, opus est in institutione populari publicarum tabularum, quarum summa sit auctoritas et fides, sive Codicis cuiusdam sacri adminiculo. Eorum enim, quibus tanta contigerit mentis excultae ingenique subacti virtus, ut propria ipsis vi huius religionis

„naturam ac necessitatem perspiciant et assequan-  
 „tur, perexiguus est mortalium numerus; maior  
 „pars alienae disciplinae adminiculo indigent et  
 „externo quodam fidei suae fundamento, quippe  
 „suarum virium et facultatum ignari, nec rectum  
 „earum usum edocti: singulis autem hominum  
 „coetibus, religionis causa collectis, communem  
 „credendorum et agendorum normam, ad quam  
 „omnis circa religionem institutio revocetur, con-  
 „stitui oportet ac praescribi. Iam vero non inte-  
 „grum semper est et in nostra positum voluntate,  
 „qualis liber Codicis sacri nomine veniat atque  
 „colatur. Namque solet plerumque in quavis  
 „fere societate religiosa (*ecclesiam* dicunt) ab  
 „antiquissimis inde temporibus talis scriptura sa-  
 „cra, tamquam communis publicae institutionis  
 „norma, asservari, cuius quidem auctoritas et  
 „fides non nisi cum maximo ipsius religionis peri-  
 „culo impugnari potest ac debet, cum Codicis il-  
 „lius origo ex vulgari, neque ea semper vana, opi-  
 „nione ad deum ipsum, tamquam auctorem, re-  
 „feratur. Quamvis igitur puriorem atque verio-  
 „rem religionem, quae sacrosanctis rationis no-  
 „strae decretis et probetur et innitatur, iuvare  
 „hominumque animis instillare, primum pu-  
 „blici doctoris officium recte censebitur, neuti-  
 „quam tamen hoc ita intelligi poterit, ut literis  
 „sacris, a singulis hominum coetibus receptis,  
 „quae per longum tempus gravitate sua steterunt,  
 „et quarum summa adhuc est in vulgus auctoritas,



„suus honos subito et uno quasi ictu detrahatur, et vel novae condantur, vel omnis scriptorum sacrorum usus ab institutione populari prorsus removeatur. Hoc enim commemoratas ob causas fieri nec potest nec debet. Itaque tantum absit, ut in libros, qui sacri a nostris hominibus habentur, iniuriosi simus et inuehamur, ut potius in eorum fide stabilienda ac vindicanda elaboremus, ipsisque adeo ad veram religionem introducendam et propagandam, adminiculi loco, utamur.“

Duo sunt momenta, de quibus *Kantius*, his allatis verbis, ex universo eius opere collectis et in summam quandam atque ordinem redactis, monere voluit. Partim enim scripturae cuiusdam sacrae necessitatem ad condendam et sustentandam ecclesiam affirmat atque defendit; partim vero, ut Codex, cuius ab antiquissimis inde temporibus publica atque divina auctoritas et perpetuus usus in ecclesia obtinuerit, non temere reiciatur aut abrogetur, sed potius, dummodo bona fide hoc fieri possit, retineatur atque ita tractetur, ut vel puriori religioni stabiliendae et iuvandae, adminiculi loco inserviat, vult ac praecipit. Utrumque *Kantius*, quod eius est acumen, egregie monuit, nec potest a nostra parte quidquam, nisi lubentissima assensus significatio adiici, cum de eodem sit omnino iisdemque de causis nobis persuasum, siue univ[er]se haec dicta putentur, siue ad

publicam Christianae fidei confessionem propius applicentur. Etenim vulgus ob ingenii imbecillitatem fidei vitaeque suae et omnis religionis exemplo quodam, literis expresso, quod divinam auctoritatem praeferebat, opus habet; cumque talis formula (*τυπος*) non nunc demum describenda sit et introducenda, sed a maioribus ad nostram aetatem plerumque pervenerit, publicum doctorem hanc retinere suisque rationibus accommodare, neque eius fidem infringere, sed defendere et confirmare, oportet. Hoc certe partim prudentia suadet, partim vero religio iubet, si nimirum ex accuratiore investigatione vere divinam doctrinam Codice isto contineri apparuerit; quod quidem circa sacros Christianorum libros omnium maxime observari, quivis rei peritus facile concedet.

Sed iam quaestio gravissimi momenti, quae ipsam causae nostrae arcem propius tangit, vel invitis nobis sese offert. Cum nimirum sacrae illae literae, quas, ab ecclesia semel receptas, publicae salutis ergo in institutione populari retinendas esse iudicavimus, plerumque remotissimis temporibus, in rudiorum hominum gratiam, et a viris illiteratis conscriptae fuerint, hancque ipsam ob causam plura praecipiant, quae nostris hominibus ac temporibus parum quadrent, nec excultae rationis iudicio probentur, aut cum verae religionis decretis omnino convenient; quaeritur, *quo-*

*modo* publicus religionis doctor haec antiquitatis monumenta, salva caeteroquin eorum auctoritate, ita tractare possit, ut ecclesiae cives a vanis illis opinionibus, quae passim impressae sunt, sensim avocentur, et ad veriores ac puriores religionis notitias unice instituantur? *qualem* igitur librorum sacrorum usum publicis religionis doctoribus commendari oporteat, si singulis illorum effatis eandem fidem atque auctoritatem concedere nefas est? Quaestionis huius, universe spectatae, solutio sine dubio ob diversam librorum sacrorum, singulis ecclesiis probatorum, rationem diverse instituetur. Cum vero, quomodo aliarum ecclesiarum doctores Codicem suum tractare oporteat, longum sit quaerere, nec scire nostra multum referat, hos mittamus, et de libris, quos Christiani sacros habent, accommodata ad seculi nostri rationes tractandis, unice exponamus, ubi antea de eo convenerimus, utrum his quoque scriptis quaedam inutiles, vanae et a communi usu alienae opiniones, quas propagari et divinae doctrinae admisceri nolint verae religionis amici, ab ingenio aetatis et auctorum impressae sint, nec ne? utrum igitur *omne* eorum argumentum ad *nos* pertineat, an vero multa solis illorum temporum aequalibus scripta censi debeant? Neque enim de tollendis et ex hominum memoria extinguendis vanis scriptorum sacrorum opinionibus recte cogitari posse, nisi antea eas vere inesse his scriptis demonstratum sit, aequae patet, atque contra,

ubi nimirum eas non inesse, sed omnia scripturae sacrae effata cum verae religionis decretis optime conspirare probatum fuerit, non inepte defenditur, universum publici doctoris munus hoc uno absolvi, ut libros sacros ecclesiae civibus rite interpretetur, et de vero eorum argumento, quippe omnes ac singulos omnium aetatum et nationum homines pariter obligante, certiores ipsos faciat. Hinc non incommode posteriorem hanc disquisitionem priori illi, quae erat principalis, praemitti existimo.

Itaque ergo quaeritur: utrum Novi Testamenti libri quaedam praecipiant, quae, utpote perversis aetatis suae opinionibus superstructa, cum nostris de vera religione notionibus non conveniant, quae moralem hominum emendationem vel non iuvent vel adeo impedian, quaeque hanc ipsam ob causam a publico doctore veritatis diligente, in institutione populari servari, et pro indubitatis religionis decretis tradi, neutiquam liceat? Patet vero, captiosae huius et spinosae quaestionis rite solvendae non nisi primas quasi lineas nunc quidem a nobis duci posse, cum prolixiorum tractationem, ut alias causas taceam, consilii nostri ratio et angustiae scriptiois huius fines excludant. Caeterum cum omnem dissimulationem homine liberali et ad veram eruditionis laudem adspirante indignam iudicemus, candidè et simpliciter, uti decet, sententiam nostram

de proposita quaestione aperiemus, si vel ea mentis ingenuitate, multorum in invidiam incurramus.

Passim igitur quaedam libris Christianorum sacris inesse, quae rude et incultum aetatis suae ingenium referant, quae rationis practicae et summae morum legis iudicio parum probentur, quae ad verae religionis exercitationem et moralem hominum emendationem nihil conducant, quaeque adeo a quovis veritatis ac virtutis magistro non adeo curari et in certis religionis decretis numerari, sed auctoribus suis relinqui, piisque hominum nostrorum meditationibus amice subduci, oporteat, ingenue et cum certa animi persuasione profiteamur. Nec deesse nobis existimamus argumenta idonea, quae huic nostrae sententiae commendandae atque tuendae apprimè inserviant. *Primum* quidem certum est et extra omnem dubitationis aleam positum, non ipsam divinitus patefactam religionis doctrinam, eamque solam atque integram, in libris Christianorum sacris contineri, sed tantum de conservatione, propagatione atque usu doctrinae huius, quae antea iam doctoribus sacris ex divina revelatione innoverat; et de variis hominum circa eam studiis, historice exponi 27). Hinc facile indicari potest,

27) De eo graviter et repetitis vicibus monuit EICHHORNIIUS, variis *Bibliothecae suae biblicae* locis, imprimis etiam, cum nuper adversus mo-

quam male et inepte *verbi divini* nomine hi libri insigniri soleant, cum rectius variarum, a doctoribus divinis conscriptarum, ad historiam revelatae religionis pertinentium, et publica auctoritate receptarum, literarum collectionem eos dici, appareat. Certe *haec* denominatio veram horum scriptorum rite aestimandorum rationem optime exprimit, *illa* contra vanis ac praeiudicatis opinionibus unice innititur, et ad easdem fovendas atque alendas temere composita videtur 28). Inde vero illud quoque sequitur, non licere singulis Codicis S. dictis unam eandemque auctoritatem concedere, cum non possint non plura aliena inesse, quae non ex divina revelatione ortum suum duxerint, nec adeo ad veram religionem pertineant. Idem *porro* intelliges, si ad consilium et causas horum scriptorum componendorum attenderis. Scilicet non eo consilio N. T. libros scriptos esse, ut omnia religionis Christianae capita ordine continuo ac definito traderentur, et certa quaedam atque immutabilis fidei vitaeque

rosiores quosdam interpretationis Kantianae patronos disputaret. Conferri quoque potest ECKERMANN in *d. theolog. Beytr.* T. IV. P. I. p. 249.

- 28) Cf. TOELLNERI Comment. *Ueber den Unterschied der Heiligen Schrift und des Wortes Gottes*; in *s. vermischten Aufsätzen*. Collect. I. p. 81. sqq. et NIEMEYERI *popul. u. prakt. Theologie*. §. 286. p. 405. sqq. ed. 3. Halae: 1795. 8.

formula describeretur, quae ad omnium insequentium aetatum homines pariter pertineret, inter omnes constat. Scriptores sacri ad *suorum* temporum aequales, et in publicum privatumve *primorum* Christianorum usum, ut primum docere, monere et praecipere opportunum videbatur atque necessarium, scripta sua exarabant 29), nec adeo serae posteritatis rationes multum curare po-

29) Verum esse, quod dixi, multi quidem superiorum inprimis aetatum Theologi vel negasse vel certe ignorasse videntur; sed quo iure et quibus de causis hoc ita fieri potuerit, nemo facile intelliget, cum res ipsa sententiae nostrae veritatem adeo evidenter doceat, ut iustae dubitationi nullus omnino locus relinquatur. Cf. NIEMEYERVM l. l. §. 5. p. 6. sqq. Historici quidem N. T. libri eo maxime consilio compositi sunt, ut, quis et qualis novae doctrinae, quae proponeretur, auctor, et quae doctrinae huius origo, propagatio et facta fuerint prima, tirones Christiani cognoscerent. Epistolarum autem Apostolicarum illud commune fuit consilium, ut tirones Christiani divinae religionis naturam penitus perspicerent, utque eorum animi in hac religione tuenda et vitae ac morum integritate exprimenda confirmarentur. Caeterum diversum fuit singulorum N. T. librorum consilium, ex peculiaribus diversorum temporum et hominum rationibus repetendum. Exposuit de hac consilii diversitate ZACHARIAE in *f. Biblisch. Theologie*. T. I. p. 6. sqq. introductio- nis. Cf. omnino IOH. DAV. MICHAELIS *Einleitung in die göttlichen Schriften des Neuen Bundes*. T. II. ed. 4. Gotting. 1788. 4.

terant. An vero, quae certis hominibus, certo quodam tempore scribebantur, ea omnia *universe* valebunt? nihilne Iudaeis et Gentilibus, recens ad sacra Christiana conversis, ita proprium fuit et peculiare, quod eodem modo ad nos, sub alio caelo degentes, longo temporis intervallo ab illorum aetate remotos, et a Christianis parentibus susceptos atque educatos, transferri posset ac deberet? nihil igitur nostra mentis ingenique indoles a primorum Christianorum cogitandi, sentiendi agendique ratione differt? quae infantibus porrigebantur alimenta, eadem et adultis apta esse putabuntur? Profecto haec talia statuere et affirmare, ipse sensus communis vetat. Mutatis temporibus mutantur homines, nec, quae olim accommodate ad certae cuiusdam gentis et familiae necessitates tradebantur, eadem et nunc omnino valere possunt. Accedit alia, eaque *tertia* causa, quae sententiam nostram: non omnia ac singula N. T. effata uno eodemque numero habenda, et in exploratis verae religionis decretis collocanda esse: egregie confirmare atque stabilire videtur; ducta illa cum ab ingenio, tum a prudenti scriptorum sacrorum ad lectores suos accommodatione. Apostolos enim caeterosque N. T. scriptores a prima pueritia Iudaico more institutos atque educatos, et, dum divinus eorum doctor in his terris degebat, multis populi sui opinionibus vanis imbutos fuisse, tam certum est, et tam clare ex ipsis narrationum de vita sua



omnique statuendi ratione reliquiis intelligitur, ut uno tantum verbo de eo monuisse sufficiat. Neque etiam post reditum Christi ad Patrem et post subsecutam Spiritus Sancti effusionem, quam Theologi dicunt, omnis eorum animus ita immutatus est, et per ipsam rei naturam immutari potuit, ut commentorum patriorum opinionumque praeiudicatarum, nationi suae propriarum, et a maioribus per manus quasi traditarum, nihil resideret 30); quod vel solum Petri exemplum (Act. X, 9. sqq.) satis luculenter docet. Ut vero haud

30) Idem monuerunt ECKERMANNUS in *d. theolog. Beytr.* T. II. P. I. p. 180. sq. atque LOEFFLERUS in libro huius tituli: *Döderleins, Eckermanns und Löfflers Gutachten über einige wichtige Religionsgegenstände. In Beziehung auf den Religionsprocess des Pred. Schulz in Gieselsdorf.* Gorlicii. 1794. 8. p. 37. Conferri etiam potest Progr. Pentecost. Gotting. anni 1789, a I. P. MILLERO conscriptum, quo docetur, cum *Theopneustia Apostolorum nec omniscientiam quasi aliquam, nec anamartesium fuisse coniunctas.* Similiter iam ERASMUS iudicavit, qui, „non est necesse, inquit, ut, quidquid fuit in Apostolis, protinus ad miraculum vocemus. *Passus est errare, suos Christus, etiam post acceptum paracletum, sed non usque ad fidei periculum.*“ Vid. ERASMI *Epistolae.* Lib. II, Oper. Tom. III. p. 97. ed. Basil. 1540. fol. Innotuit mihi hic locus ex libro variae et copiosae doctrinae pleno, dico *Herb. Marsh's Anmerkungen und Zusätze zu I. D. Michaelis Einleitung ins N. T. Aus d. Engl. übersetzt von E. Fr. K. Rosenmüller.* T. I. (Gotting. 1795. 4.) p. 22.

facile quispiam erit, qui, quae ipse male et perverse cepit, eadem alios recte docere possit, ita sponte intelligitur, quam parum credibile sit, hos tales viros, quales N. T. scriptores fuisse monuimus, veram religionis doctrinam ore et literis ita proposuisse, ut nihil plane alieni et inepti de suis opinionibus admisceretur. Partim enim, ut iam dixi, ob ipsum eorum ingenium fieri hoc aliter non potuit, partim vero prudens atque necessaria ad auditores et lectores accommodatio de eodem videtur persuasisse. Scilicet communis lex est et ex ipsa animi humani natura hausta, quae institutionem popularem ad auditorum opiniones, consilia, mores, instituta, consuetudines ac leges, quatenus ea sincero pietatis atque virtutis studio non omnino adversentur, accommodari praecipit. Qui inveteratam populi cogitandi agendique rationem semel et uno quasi ictu immutare atque evertere nititur, qui omnes eius vanas opiniones et perversa studia promiscue damnat, et cum impetu in ea invehitur, nae ille parum proficiet, suisque bonis conatibus maxima ipse impedimenta obijciat; contra qui prudenter, et quantum per summam morum legem licet, novam suam doctrinam populi ingenio accommodat, nec aperte et disertis verbis omnes vanas opiniones ac inutilia instituta reiicit, sed veri videndi rectiusque sentiendi adminicula sensim et aliud quasi agendo auditoribus subministrat, ille demum consilii sui, ut rectius instituantur et emendentur auditores, obti-

nendi certus esse, et de exoptato studiorum suorum eventu confidere potest. Quae cum ita sint, quis tandem non intelligat, primos quoque religionis Christianae doctores, si certum laborum suorum fructum percipere voluerint, adminiculis etiam idoneis uti, h. e. communis illius legis, quam diximus, recessitati ita obtemperare debuisse, ut doctrinam suam auditorum et primorum lectorum rationibus, quantum liceret, accommodarent? et cui hanc ipsam ob causam non sit persuasum, magnam eorum partem, quae in N. T. libris traduntur, ad solos *illius* aetatis homines pertinuisse, et multa sacros doctores aliter scripturos fuisse, si nunc demum, in *nostrorum* hominum usum, scripta sua exarassent? quis igitur, haec perpendens, non omnia ac singula N. T. effata in communium locorum numero habenda esse, prae fracte negare audeat 31)?

Videmur nobis, quod volebamus, argumentis sat gravibus *universe* demonstrasse; superest, ut exempla quaedam adiiciamus, atque ita sententiae nostrae veritatem omni ex parte compro-

31) Breviter quidem, et docte et subtiliter, ut solet, de importuna hac, communes locos et universe dicta ubique inveniendi, libidine eiusque causis disputavit REINHARDUS in Comment. *de locis quibusdam, qui in sermonibus Domini temere putantur communes*; Spec. I. Vitemb. 1780. 4. p. 3 — 10.

bemus. Iuvat autem ea N. T. effata, quae cum nostris de vera religione notionibus parum conveniunt, quaeque adeo ut sensim ex institutione populari excludantur, nostra multum int. rest, *duplici* classe comprehendere. Alia enim ad dogmatum et decretorum in se certorum ac indubitatorum probationem atque illustrationem pertinent, alia vel ipsorum dogmatum speciem referunt, vel simpliciter a sacris doctoribus traduntur. *Illorum* innumera exempla et singulis fere N. T. paginis occurrunt. Nec hoc mirum. Etenim cum omnis religionis Christianae doctrina, ut paulo ante monuimus, non eo modo, qui communem persuadendi et obligandi vim haberet, tradi posset, sed ad auditorum et primorum lectorum captum atque ingenium accommodari, iisque argumentis et adminiculis, quae tunc temporis maxime utilia et necessaria viderentur, commendari, firmari ac propagari deberet; quis, quaeso, aequus arbiter Iudaica illa et a nostro usu aliena scriptorum sacrorum argumentatione et universa disputandi methodo offendatur? quis potius insignem doctorum divinorum prudentiam et dexteritatem in hac sua doctrinae Christianae tractatione non agnoscat et probet? Sufficiat autem brevitatis causa, ex ingenti testimoniorum numero Christi cum Sadducaeis de animorum immortalitate colloquium, (Luc. XX, 27—39. cl. Matth. XXII, 23—33. et Marc. XII, 18—27.) Pauli de Mosaicae legis abrogatione in epistola ad Galatas disputationem,

et auctoris ad Hebraeos epistolae de victimarum cruentarum per mortem Christi abolitione, itemque de religionis Christianae prae Iudaica constitutione praestantia, argumentationem, exempli loco, hanc in rem commemorasse. *Istis* temporibus, et ad Iudaeorum, recens ad sacra Christiana converforum, animos convincendos, eam probandi docendique rationem, quae his in locis obtinet, maxime idoneam fuisse et pulchre compositam, nemo facile ibit infitias 32); sed si nunc apud nos publicus religionis doctor iisdem argumentis eodemve ratiocinationis genere uti

- 32) Videantur interpretes, inprimis vero ad locum Lucae ECKERMANNUS in *d. theolog. Beytr.* T. I. P. I. p. 104. sq. et HAMMERUS in Comment. nota 18. laud. p. 29. sqq. ad disputationem Pauli in epistola ad Galatas KOPPIUS in praestantissima sua N. T. editione. Vol. VI. quod auctius et emendatius altera vice prodiit Gottingae. 1791. 8. maxime ad Cap. IV, 24. et de argumentationis atque illustrationis methodo; in epistola ad Hebraeos obvia, HEINRICHS in *prolegomenis* ad epistolam Pauli ad Hebraeos, perpetua adnotatione ab ipso illustratam. Gotting. 1792. 8. p. 28—32. atque GRIESBACHII in Commentt. II. *de imaginibus Iudaicis, quibus auctor epistolae ad Hebraeos in describenda Messiae provincia usus est*; separatim primum Ienae ann. 1791. 1792. 4. editis, nuper autem, cum essent ab auctore recognitae, in *Commentationum theologicarum a VELTHUSEN, KUINOEL, et RUPERTI editarum* Vol. II. (Lipsiae, 1795. 8.) p. 327. sqq. denuo recufis,

vellet, is profecto religioni, auditoribus sibi que ipse male consulere existimandus foret. Patet igitur, quae ad probanda et illustranda religionis Christianae capita a doctoribus sacris proferantur, ea magnam partem *suae* aetati relinquenda esse, nec in publicam nostrorum hominum institutionem temere transferenda. Sed iis quoque N. T. effatis, quae vel ipsorum dogmatum speciem referunt, vel simpliciter a sacris doctoribus traduntur, multa aliena, quae ad veram religionem non pertinent, immixta videntur; eaque *alteram* supervacaneorum atque inutilium placitorum classem constituunt. Huc spectant primum varia morum vitaeque praecepta, a communi omnium hominum ac temporum usu aliena 33); v. c. de divitiarum contemptu et voluntariae paupertatis necessitate, de bonorum terrenorum omniumque corporis voluptatum et oblectamentorum despici-

- 33) Ex instituto et cum cura hanc materiam separatim pertractarunt: NITZSCHIIUS in Commentt. de iudicandis morum praeceptis in N. T. a communi omnium hominum ac temporum usu alienis; quae inde ab anno 1791. 4. statis temporibus Vitembergae prodierunt, et adhuc continuantur; et SINTE-NIS in libro nota 15. citato, ad quem cf. *Tübing. Gelehrte Anzeigen*. a. 1795. no. 14. ubi nonnulla bene, plura non satis commode, ut videtur, contra monentur. Adde AMMONII *Christl. Sittenlehre nach einem wissenschaftlichen Grundrisse*. Erlang. 1795. 8. §. 5. p. 8. sq. et §. 77. p. 85.

entia, devotis et ieiuniis, de abstinentia a matrimonio, de esu suffocati et sanguinis, de luctationum cum Satanae et pravarum cupiditatum tentationibus perpetuitate, caetera; porro huc pertinent multae narrationes historicae, v. c. de daemoniacis, de tentatione et glorificatione (sit venia verbo theológico!) Christi in monte, de lustratione Mariae in templo et sacrificii pro recens-nato puero oblatione, de familiarum recensitionibus seu genealogiis, de visionibus et angelorum speciebus apparentibus, de ingenti miraculorum patratorum numero 34), et quae sunt huius generis alia; de-

34) Non ita haec intelligi volo, ac si miracula Christi et Apostolorum aetate omnino nulla accidisse contendam. Ab hac temeritate longissime absum. Hoc tantum significare volui, nostros homines a miraculorum illorum lectione et contemplatione magis avocandos esse, quam ad eam incitandos, *partim* quia parum faciant ad moralem animorum emendationem, quae mentis nostrae acies capere et assequi non valet, *partim* quod crebra portentorum et miraculorum consideratione imperitos animos ad multas fanaticas ipsique religioni et virtuti perniciosissimas opiniones facile adduci constet, *partim* denique, quoniam omnis miraculorum vis probandi ad solos spectatores pertinerit et pertinere debuerit; quam in rem cf. TELLERII *Excurs. III. ad BURNETI de fide et officiis Christianorum librum*. p. 282, sqq. et ZIEGLERI *Comment.* nota 24. laud.

nique ex theoreticis etiam doctorum sacrorum praeceptis nonnulla ad hanc classem referenda erunt, v. c. de angelorum ordinibus et ministerio 35), de vi Satanae in homines 36), de Messia eiusque regno 37), de instante eoque visibili

35) Vid. *Anonymi Comment. Kritik über die Lehre von den Engeln in der Dogmatik*; in HENKII Magazin, T. III. p. 300. sqq.

36) Conf. ECKERMANNI *Compend. theologiae Christ. theoret.* Part. pr. §. 44—49. p. 88. sqq. et HENKII *Lineamenta instr. fidei Christ.* §. 93. p. 110. sqq. Omnis Daemonologia Iudaica et Christiana post Babylonici demum exilii tempora definita est et magis exculpta. Cf. *Beyträge z. Beförder. des vernünft. Denkens in d. Religion.* Partic. II. p. 87. sqq. Antiquiores Iudaeorum libri sacri aliter de angelis bonis malisque praecipunt; quae est scita KUINOELII *Observatio ad Matth. XVII, 10.* in *Observatt. ad N. T. ex libris Apocryphis V.* T. Lips. 1794. 8. p. 25.

37) De vera officii et regni Messiani notione, ex N. T. libris, et imprimis ex sermonibus Christi constituenda, itemque de usu huius dogmatis hodierno, mirum quantum dissentiunt Viri docti. Meam qualemcunque de hoc momento sententiam, cum brevi aliarum explicationum recensione, nuper exposui in *Comment. vernac. Ueber die Aeußerungen Jesu von dem Reiche des Messias, zu Matth. 19, 27—30.* in HENKII Magazin, T. II. p. 359. sqq. cui nuperrime haec accessit appendicula: *Ueber die Unterscheidung einer doppel-*



Christi in has terras reditu 38), de reviviscentibus et in venustiore formam componendis hominum corporibus 39), de gaudiis beatorum in coelo et poenis damnatorum in Orco 40), de

D 2

*ten Wiederkunft Christi.* T. IV. p. 175. sqq. Non habere existimo, quod commentationis humius me auctorem publice nunc profiteri dubitem.

38) Apostolos non solum ipsos vulgaribus populi sui opinionibus de regno Messiano his in terris post insignem mundi renovationem condendo, et de instante eaque visibili Christi ad hoc regnum solemmniter inaugurandum reditu, imbutos fuisse, sed easdem etiam scriptis suis propagasse, evidenter et ita quidem, ut nullus facile contradicendi locus relinqueretur, docuit *venerandus* ECKERMANN in *d. theolog. Beytr.* T. II. P. I. p. 180. sqq. Conferri etiam potest AMMON, (*N. theolog. Journ.* Vol. III. p. 185. 198.) HERDER, (*Von der Auferstehung. als Glaube, Geschichte u. Lehre.* Rigae 1794. 8. p. 114. sqq.) LOEFFLER l. nota 30. l. p. 36.

39) Pertinet hoc dogma ad ipsam de Messia eiusque regno doctrinam, adeoque eodem modo de hoc, atque de illa, iudicandum erit. Cf. HAMMERI disput. bis iam laud. et FLUEGGE *Geschichte des Glaubens an Unsterblichkeit, Auferstehung, Gericht und Vergeltung.* Vol. I. (Lipsiae 1794. 8.) p. 252. sqq.

40) Diversam piorum atque impiorum post fata sortem a me non negari, per se intelligitur: num

Christo pro hominibus apud Patrem deprecante 41), et alia, quae non nostrum est longius

vero vulgares N. T. dictiones, totae illae ad Iudaeorum ingenium et communem loquendi usum compositae, rem satis apte et definite describant, haec longe alia quaestio est, quam equidem simpliciter non affirmaverim. Caeterum non consentiunt interpretes, utrum proprie, an tropice, has dictiones intelligi voluerint sacri auctores. Vid. FRISCH *Vergleichung der Ideen über Auferstehung, Gericht und Unsterblichkeit in den Apocryphen des A. T. u. den Schriften des N. T.*; in EICH-HORNII *Biblioth. d. Bibl. Liter.* T. IV. P. IV. p. 653. sqq. Hoc tamen certum esse videtur, Christi et Apostolorum populares admodum humiliter et indigne de futura hominum sive piorum sive impiorum post mortem conditione statuisse.

- 41) Refert haec formula, si quae alia, ingenium Iudaicum, (cf. 2 Maccab. XV, 12. 14. et *Iosephi Antiquitt. Iud.* I, 14.) et humilior est, quam quae cum sanioribus de deo et de meritis Christi circa genus humanum notionibus conveniat. Hinc sine dubio factum est, ut recentiores quidam Theologi ad puriorem sensum eam revocare studerent, ita quidem, ut nihil aliud significari defenderent, quam hoc: *Christum ad summam dignitatem evehum adhuc esse et manere causam salutis nostrae atque auctorem.* Vid. b. MORUM in *dissertatt. theolog. et philol.* Vol. I. (Lipsiae 1787. 8.) p. 298. sqq. Num vero usus loquendi et historicae interpretationis leges hunc puriorem sensum admittant, de eo equidem vehementer dubito.

nunc recensere. Sufficiunt enim consilio nostro ea, quae attulimus, exempla, et videmur nobis, quod volebamus, scilicet non omnia ac singula N. T. effata ad communem verae religionis disciplinam pertinere, satis iam demonstrasse. Neque etiam quemquam facile fore existimamus, qui sententiae nostrae, in universum spectatae veritatem in dubium vocare velit aut possit 42), si

42) Videtur quidem ECKERMANN aliter sentire. Nam statuit, (*theolog. Betr.* Vol. IV. P. I. p. 249. sqq.) Scripturam S. omnino nihil continere, quod vanum sit et inutile, nec verae religionis exercitationem et moralem hominum emendationem atque virtutem iuvare possit. Sed haec non simpliciter et, ut verba proprie sonant, intelligi vult acutissimus Auctor. Ipse enim statim addit: (p. 250.) *Aber wir achten billig auf das, was Gott durch die heiligen Schriftsteller lehren wollte, und unterscheiden dieses von den Zeitbegriffen, den darnach gebildeten Sätzen, und den Redensarten und Bildern, in welche sie die Wahrheit, die sie lehren sollen, nach ihrem individuellen Ideenzustande, und nach dem Bedürfnisse und der Fähigkeit ihrer Zeitgenossen einkleideten:* et pagina sequenti. *Wir erforschen den eigentlichen buchstäblichen Sinn eines jeden Satzes der Bibel; aber wir erwarten nicht in einem jeden eine Belehrung für uns, sondern zunächst eine Belehrung für die ersten Leser, ihren Einsichten, ihrem Fassungsvermögen angemessen:* hisque verbis clare significat, se tantum de divina librorum S. doctrina, ab omnibus hominum aditamentis et aliarum rerum involucris purgata,

vel singula argumenta et exempla non omnibus eodem modo probentur. Caeterum licet omnes ac singulas N. T. partes ad universalem religionem referre dubitemus, neutiquam tamen ipsam horum librorum fidem et divinam auctoritatem eo impugnari, per se intelligitur. 43) Continent enim haec scripta, ex nostra quoque persuasione, doctrinam vere divinam, quae non sine peculiari summi Numinis efficientia et procuratione illo quidem tempore tradi potuit, et quae praeterea insunt, a consilio et natura verae religionis et a nostrorum hominum usu aliena, ea ipsa maximam partem ad introducendam et popularibus commendandam novam doctrinam necessario requirebantur. Manet igitur suum sacro Codici pretium, manet sua auctoritas.

loqui; atque hoc sensu omnino verum est, quod dicit. Contra si de omni Scripturae argumento et de singulis dictis quaeritur, non potest negari, multa inesse, quae non pertineant ad communem religionis disciplinam, quippe vanis aetatis suae opinionibus superstructa. Cf. DOEDERLEINII *Institut. Theologi Christ.* Part. pr. §. 34. 35. p. 109. sqq. ed. 5. NOESELLTI *Bildung angehender Theologen.* T. II. §. 41—46. p. 55. sqq. et §. 145. 146. p. 203. sqq. ed. 2.

43) Quae sit illa auctoritas et quo nitatur fundamento, accurate definivit HAENLEIN in *f. Handbuch der Einleitung in die Schriften des N. T.* Vol. I. (Erlang. 1794. 8.) Cap. IV. §. 4. 5. p. 264. sqq.

Iam redeamus ad *Kantium* nostrum, ipsamque eius de libris sacris accommodata ad seculi nostri rationes tractandis legem diligenter et sine omni partium studio examinemus ac diiudicemus. Adhuc enim non nisi de fundamentis Kantianae interpretationis locuti sumus, et hactenus inter utrumque nostrum convenit, quod vera religio cogitari non possit, nisi quae sanae rationis et summae morum legis iudicio probetur, quod, hanc veram religionem commendare atque propagare, primum esse debeat publici doctoris officium, quod ad introducendam et iuvandam veram religionem, cum primum homines in certam ecclesiae formam coierint, sacri cuiusdam Codicis adminiculo opus sit, et quod hanc in rem non nunc demum novus Codex componi, sed ille antiquus, qui plerumque iam adesse soleat in ecclesia, et cuius a longissimis inde temporibus summa semper fuerit auctoritas, in posterum quoque, tanquam communis publicae institutionis norma, retineri et ad hunc usum accommodari debeat. De his igitur omnino convenimus. Et cum deinde illud quoque *Kantius* monuisset, non posse non istis antiquitatis monumentis, quamvis sacra sint et habeantur, multa vana atque inutilia decreta ab ingenio aetatis et auctorum impressa esse, quae moralem hominum emendationem virtutisque studium vel non iuvent, vel adeo impediunt, quaeque hanc ipsam ob causam ad religionis exercitationem nihil conducant, visum nobis est quae-

rere, utrum de libris, quos Christiani sacros habent, quosque nunc potissimum curamus, idem quoque valeat, nec ne? et sane haecenus, quod bona malis, communia atque universalia localibus et temporariis, vera denique falsis mixta sint, similem, quamvis non omnino eandem, his scriptis cum aliis antiquitatis operibus intercedere sortem, adeoque verum esse, quod sumserat *Kantius*, accuratius in universum illorum librorum argumentum inquirendo apparuit. Sic tandem solutis atque expeditis, quae prima omnium erant solvenda et expedienda, haec nostra disputatio ad ipsam causae arcem propius nunc accessit. Ea videlicet quaestio iam nobis sese offert, *quomodo* libri sacri, salva caeteroquin eorum auctoritate, ita tractari possint, ut a vanis illis opinionibus et temporariis decretis, quae insunt, ecclesiae Christianae cives sensim avocentur, et non nisi certa atque communia religionis praecepta edoceantur, utque adeo unicum verae religionis consilium, quod ad emendandos et tranquillandos hominum animos pertineat, istorum librorum instrumento recte iuvetur et vero etiam obtineatur? Gravissimam hanc esse quaestionem neque adeo facilem ad solvendum, intelligentes harum rerum arbitri sponte iudicabunt. Hinc profecto optandum erat, ut vir tam subtilis iudicii tantique acuminis philosophus, qualis *KANTIVS* recte celebratur, quaestionis illius rite solvendae curam in se susciperet; et quamvis ipsius praecepta non eo-

dem modo singulis reipublicae literatae civibus ac  
 statutoribus probari, omniumque plausum ferre po-  
 terant; gratias tamen varias ob causas huic im-  
 mortali viro pro indefesso suo bene de religione  
 et ecclesia merendi studio agere, neque lingua-  
 rum, Orientalium maxime, inscitiam exprobrare,  
 omnemque hanc rem decernendi facultatem ab-  
 iudicare, homines doctos oportuit. Namque  
 nunc non de singulis librorum S. verbis loquendi-  
 que formulis, ad grammaticas regulas rite inter-  
 pretandis, quaerebatur, sed omnis disquisitio ad  
 longe aliud quidquam pertinebat, nimirum ad  
 constituendam universalem quandam legem, quae  
 certam nostrisque temporibus accommodatam Co-  
 dicis sacri in ecclesia tractandi rationem rectumve  
 usum exacte definiret. Quis vero non videat,  
 idoneum de hoc momento iudicium pendere non  
 tam ab accurata multarum linguarum scientia,  
 quam a subtili verae religionis, humani animi et  
 sensuum, nostris aequalibus priorum, perspi-  
 cientia? Quis igitur summo philosopho et acutis-  
 simo humanae naturae investigatori ius suffragii in  
 hac causa denegare audeat? Sed haec non tanti  
 res est, ut plura verba adiiciamus, modo illud  
 pateat, quantopere saepius ineptiant viri alias in-  
 telligentissimi, si semel a praeconcepta quadam  
 opinione circumveniri et nimio disputandi fervore  
 abripi se patiantur. Omissa igitur omni de iure  
 decernendi quaestione, quae in medium protulit  
*Kantius*, grata mente accipiamus, iisque recte

utamur; quod quidem nunc ita a nobis fiet, ut observationes quasdam, a sincerissimo veritatis amore dictatas, praeceptis Kantianis adiungamus.

Quodnam KANTIUS de proposita quaestione tulerit iudicium, et qualem librorum sacrorum usum nostrorum hominum rationibus optime convenire statuatur, hoc supra (p. 17. qq.) fusius explicavimus. Liceat nunc summam rei paucis verbis repetere. Suadet nimirum Vir illustris *moralem* five *practicam* sacri Codicis interpretationem, eamque ita institui praecipit, ut *scriptorum divinorum verbis omnino tribuatur sensus, qui cum certis rationis nostrae de vera religione notionibus optime conspiret, atque ad moralem hominum emendationem virtutemque iuvandam apprime faciat, si vel ille sensus non videatur ex orationis ingenio et contextu proprie existere, dummodo nulla aliqua ratione ex auctorum sacrorum diffinitionibus elici aut certe adnecti iis possit*. Haec ille non sine acumine et cum singulari quodam veritatis colore iudicavit. Etenim si, quod dedit Kantius, responsum cum ipsa quaestione proposita contuleris, prima quidem specie omnia optime et ita congruere tibi videbuntur, ut, quid melius et ad rem aptius suadeas, vix succurrat 44). Aut

44) Hinc non inepte Kantianae librorum S. tractationi ea laus tributa est, ut certe logica quadam et naturali consecutione cum iis, quae antea



enim, inquires, vera religio et moralis hominum emendatio Codicis cuiusdam sacri adminiculo omnino iuvare nequit; aut certe Kantianae illi rationi, quae singula scriptorum divinorum effata ad puriorem sensum revocari iubet, et omnia aliena praecepta excludit, vera ea laus debetur, ut ad spem eventus respondeat. Habent ea, fateor, multam veri speciem, neque etiam negari potest, quae passim Viri docti contra disputarunt, ea magnam partem omnino vana esse atque irrita, ut supra (p. 23. sqq.) ipse ostendere conatus sum; nihilo tamen secius remanere adhuc videntur difficultates quaedam, quae me quoque impediunt, quo minus Kantianam illam librorum S. tractationem ipse probare aliisque commendare queam. Iuvat igitur, quae circa hanc rem moneri posse videantur, singulatim nunc exponere, et ad quasdam observationes revocare, quarum quidem haec erit ratio, ut primum quid *universe* in Kantianis praeceptis desiderem, notetur, deinde vero, cur admitti ea probarique nolim, *speciatim* doceatur. Num omnia, quae dicturus sum, recte se habeant et digna sint attentione, de eo arbitri me intelligentiores iudicent.

Cogitanti mihi de Kantiana interpretationis sacrarum literarum lege *in universum* hoc maxime

displicebat, quod modus, quo exerceri ea lex possit ac debeat, nusquam fatis accurate descriptus sit atque definitus, quodque adeo ab uniuscuiusvis interpretis arbitrio plus, quam oportuit, pendeat 45). Videamus de hoc momento. Summa interpretationis lex, ex *Kantii* mente, haec erat, ut scriptorum divinorum verbis, ubicunque fieri posset, sensus moralis tribueretur. Iam primum quaeritur, ubinam loci hoc recte fieri possit? respondet *Kantius*: ubi verba permittunt. Bene quidem, sed non sufficiunt haec. Rursus enim nova oritur quaestio: unde videlicet iudicari possit, num moralem sensum verba admittant, nec ne? Ad hanc vero quaestionem nulla datur in libello *Kantiano* responsio. Dicas fortassis: non opus illa erat; namque per se intelligitur, hoc, quod quaerebatur, semper iudicandum esse ex propria atque genuina ipsorum verborum significatione. Ita quidem videtur; sed hanc non esse veram *Kantii* mentem, inde luculenter apparet, quod licere ille ait, scriptorum sacrorum verbis vim inferre et sensum puriorem vel invito orationis contextu substituere. Vides igitur, accuratam quandam definitionem hic desiderari, omnemque hanc rem a solo interpretis arbitrio pendere. Quaeritur porro: *qualis* sensus moralis singulis sacri Codicis locis tribui debeat? re-

45) Cf. *Einige Bemerkungen über Kants philosophische Religionslehre*. p. 136, sqq.

spondet *Kantius*: qui in se ac sine omni probatione historica verus sit, simulque ita se habeat, ut ille ipse, quem tractamus, locus non nisi hoc admisso sensu ad moralem emendationem quidquam conducat. Iam vero similis hic existit interrogatio, ac paulo ante proposuimus: nimirum, unde tandem iudicari possit, num certus quidam sensus moralis huic vel illi Scripturae S. loco ita conveniat, ut unus ille solus recipi debeat et commendari? Cum liceat interpreti verba detorquere, nonne plures cogitari possunt sensus, qui pari modo ad iuvandam animorum emendationem spectent? et qua tandem ratione unius prae altero praestantiam vis metiri? *Kantius* certe nihil definit, et manet hoc quoque uniuscuiusvis interpretis arbitrio permixtum. Sic igitur satis iam apparere existimo, quam minus accurate omnis *Kantii* de libris sacris interpretandis praeceptio descripta sit, neque pluribus hanc in rem argumentis opus esse videtur. Interim unum adhuc subiungam documentum, quo melius de monitorum meorum veritate constet. Dicit nimirum *Kantius*, nolle se puriorem illum sensum, qui sacris dictis tribuatur, ipsorum auctorum menti falso obtrudi, quod quidem per bonam interpretis fidem non liceat, esse potius omnem hanc de vera et propria scriptorum divinorum sententia quaestionem in medio relinquendam, dummodo hoc doceatur et demonstretur, posse verba hunc in modum explicari. Iam vero nemo facili intel-

liget, quomodo illud *non posse* iis in locis, quibus proprie alius sensus inest, quam qui ex Kantianis praeceptis eruitur, recte declarari queat; et oportebat *Kantium*, si ullo alio, hoc certe loco exactiorem quandam legi suae definitionem adiicere. Quod cum factum non sit, nobis etiam, quod de hac iustae accuratationis inopia conquesti sumus, venia dabitur.

Alterum, quod in Kantiana Codicis S. translatione, *universe* spectata, mihi displicuit, est ipsum nomen, quo eam insigniri voluerunt. Uti scilicet sunt moralis sive practicae *interpretationis* titulo, satis illo quidem specioso, sed minus commo 46). Etenim si scriptorem, cuius is cunque sit aetatis et generis, *interpretari* nihil aliud est, quam docere et declarare, quid ipse quovis loco cogitaverit senseritve, et quomodo orationem suam ab auditoribus et lectoribus intelligi voluerit, hoc vero non nisi grammaticae et historice investigari potest; sequitur, qui ad *Kantii* et exemplum et praecepta, Codicem S. ita tractat, ut veram atque genuinam auctorum sententiam non ita multum curet, et orationis sensum aliunde, quam

46) Idem iam ab aliis repetita vice, neque tamen semper eodem plane modo et consilio monitum est. Vid. ROSENMÜLLERI *Bemerkungen etc.* p. III. sqq. BECKII disput. nota 18. laud. p. 15. sq. et *Auctoris anonymi* l. nota superiore l. p. 128. sq.

ex propria verborum vi ac potestate metiatur, eum neque ipsum *interpretis*, neque hanc suam librorum divinorum tractationem *interpretationis* nomine recte insigniri posse. Quemadmodum vero *Kantium* eiusque amicos veram interpretationis notionem ignorasse, sumi non potest, hancque ipsam ob causam haud facile intelligitur, qua tandem ratione fieri potuerit, ut Kantianae Codicis S. tractationi practicae interpretationis nomen tribueretur; ita factum hoc esse eo magis mirari subit, cum Kantius ipse, ut supra monui, disertis verbis significaverit, nolle se suam libros S. tractandi rationem pro vera et propria *interpretatione* haberi, hocque unum fuisse sibi propositum, ut certam quandam et bene fundatam S. S. effata ad *moralem usum* revocandi legem constitueret. Caeterum haec ipsa denominatio in causa fuisse videtur, ut tam crebris tamque iniustis saepe et vanis criminationibus, v. c. de instaurando allegoriarum studio et de inevitabili verae eruditionis contemptu, omnis *Kantii* praeceptio peteretur. Quicumque enim, quid sit *interpretari*, didicerat, ille facile iudicabat, Kantianae librorum S. tractationi hoc nomen nullo modo competere; cumque nihilominus titulus ille *Kantio* eiusque amicis placuisset, fieri aliter vix potuit, quam ut id indignati viri docti graviter nec sine acerbitate quadam obloquerentur, utque adeo eum ipsum, qui de interpretatione proprie sic dicta omnino nihil praeceperat, allegoricae mysticaeve inter-

pretationis instaurorem habere et nuncupare nulli dubitarent. Rarum quidem erroris et prae-  
 posterius iudicii exemplum; sed patuit tamen ex  
 hoc quoque eventu, quam multum saepe a rerum  
 nominibus pendeat, et quantopere peccent, qui  
 vel decantati illius: *in verbis simus faciles*: pa-  
 trocinio abutentes, vel quacunque alia de causa a  
 communi loquendi usu temere et paulo inconsul-  
 tius recedant.

Haec erant quae in Kantianis decretis, *uni-  
 verse* spectatis, mihi displicerent. Cum vero his  
 ipsis monitis, utut verissima sint, parum aut nihil  
 omnino contra novam illam Scripturae tractatio-  
 nem effici facile intelligo, necesse erit, ut, cur  
 admitti eam probarique nolim, *singulatim* nunc  
 exponam. Quo vero minus Celeb. Kantii prae-  
 ceptis adfentire queam, illud maxime obstat,  
 quod talis librorum S. tractatio, qualem ille po-  
 stulat, ex meo quidem iudicio, cum sacrosancto  
 veritatis atque integritatis officio et cum bona pu-  
 blici doctoris fide nullo modo conciliari, neque  
 adeo coram summo rationis practicae tribunali  
 recte defendi possit. Namque si scriptorum divi-  
 norum effata ab eo nominatim, qui, veritatis do-  
 ctor et Codicis S. interpret publice constitutus est,  
 et coram iis nominatim qui, veram atque genui-  
 nam singulorum dictorum sententiam eruendi et  
 constituendi facultate ipsi destituti, hanc magistro  
 suo provinciam imperarunt, hancque fidem ha-  
 bent,

habent, ut demandato ipsi interpretis munere religioso et ex optima fide fungatur, si, inquam, hac rerum conditione posita, scriptorum divinorum effata consulto ad alium sensum, quam qui proprie verbis inest, revocantur, recte hoc dolum malum et fraudem illicitam dixeris 47), quam neque accommodationis ad vulgi caput et opiniones necessitas 48), neque exemplorum, ab antiquioribus et recentioribus populi doctoribus

47) Cf. *Briefe über d. Perfectib. d. geoffenb. Relig.* p. 257. et *Allg. L. Z.* 2. 1795. no. 78. p. 624. Adde, quae monuit AMMON *im N. theolog. Journ.* T. III. p. 498. T. IV. p. 44.

48) Errores in vulgò receptos atque inveteratos aliquamdiu tolerare, iisque adeo meliorem institutionem superstruere, hoc quidem licitum est et interdum etiam necesse; vid. omnino REINHARDI *System der Christl. Moral.* Vol. II. §. 259. p. 225. sqq. ed. 1. live p. 243. sqq. ed. 2. et cf. Io. IAC. HOTTINGERI *Oratio de caute oppugnandis opinionibus vulgi religiosi.* Turici. 1794. 8. sed longe alia res est, hominum inscitia ita abuti, ut, dum interpretem audire opinentur, audiant philosophantem et ex suo sensu Codicis S. dicta tractantem Theologum, et ubi propriam atque genuinam scriptorum divinorum sententiam exponi putent, alius, quamvis purior et verior, sensus tacite substituatur; quod quidem per summam rationis practicae legem nullo modo licebit.

repetitorum, auctoritas 49), neque etiam consilii sic demum obtinendi bonitas et laudabile virtutis veraeque religionis iuvandae studium 50) satis excusabit. Videtur *Kantius* ipse has difficultates sensisse, cum iam in antecessum expedire eas atque remove studuerit, modo tamen parum idoneo nec satisfaciente. Dicit nempe (p. 161. ed. 2.):

49) Provocat nimirum *Kantius* ad exempla aliorum popularium doctorum ex variis gentibus. Partim vero ea ipsa, quae attulit, exempla non omnino quadrant, partim de his quoque valet, quod in univertum in exempla cadit: *illustrant*, non *probant*.

50) Pravis enim et illicitis ad rem perficiendam adminiculis uti, nullo non tempore et loco prohibitum est, nec potest causae ipsius, quam persequimur, bonitas interdicti huius vim infringere, ut omnes, qui communium, ex rationis practicae fonte derivatarum, legum auctoritatem reverentur, facile concedent. Aliter tamen tantum non omnibus antiquioris ecclesiae patribus visum est; vid. RIBOVII Progr. de *oeconomia Patrum et methodo disputandi* κατ' ὁμοιομίαν. Gotting. 1748. 4. coll. Mag. F. AUG. CARUS dissert. *historia antiquior sententiarum ecclesiae graecae de accommodatione Christo in primum et Apostolis tributa*. Lips. 1793. 4. p. 31—34. et Viris doctis (si fas est doctos eos dicere), qui ex famosa societate Iesu supersunt, etiamnum videtur: quam in rem cf. *Berlinische Monatschrift*. October. 1794. p. 292. sqq.



„fraudis nomen in moralem Codicis S. tractationem non recte cadere, modo ne sensum illum puriorem, qui singulis eius dictis tribuatur, doctorum divinorum menti, dum scriberent; vere obversatum fuisse falso affirmemus, sed omnem hanc rem integram relinquamus, hocque unum sumamus ac demonstramus, *posse* verba eum ipsum, qui placuerit, in modum explicari.“ Non nego, hanc difficultates solvendi methodum ingeniose a *Kantio* excogitatam esse, et multam prae se ferre speciem; habeo tamen, cur me nondum poeniteat, parum idoneam nec satisfaciensem eam dixisse. Qui enim in tractando Codice S., cuius interpretem se profitetur, ita versatur, ut proprium verborum sensum prudens et sciens negligat, alium, de quo scriptorem non cogitasse, ipse sibi persuasum habet, substituat et commendat, atque adeo, posse verba hunc in modum explicari, ulla aliqua arte demonstrare studeat, eum imperitae auditorum et lectorum multitudini imponere, et fraudis cuiusdam (quam sive piam sive impiam dixeris, nihil interest,) reum fieri, si vel maxime suam, quam tradit et commendat, sententiam auctori ipsi, in quo explicando et illustrando occupatur, non aperte et disertis verbis obtrudat, idonei harum rerum arbitri facile, et quo quisque est incorruptior ac minus cupidus causae disceptator, eo certius iudicabunt. Namque cives ecclesiae, ad quos haec institutio pertinet, *interpretis* munus magistro suo iniunxerunt,

hincque veram scriptorum sacrorum sententiam *bona fide* ab eo exponi putant, nec scire possunt, alium verbis tribui sensum, quam qui proprie insit, nisi hac de re nominatim moneantur. Quam diu igitur publicus religionis doctor, qui has alumnorum suorum rationes atque expectationes non potest non cognitās habere et perspectas, in tractando Codice S. certum ac genuinum verborum sensum consulto negligit, et quemcunque alium, qui purior sit et verior, tacite substituit, neque aperte significat, se non, quid verba proprie sibi velint, sed, qualem admittant usum moralem, quaerere et curare; tam diu auditoribus et lectoribus imponere et fraudis reus fieri, ex meo quidem iudicio, censendus erit. Si vero, ut hanc fraudis suspicionem a se suisque studiis removeat, quotiescumque interpret esse definit et de Scripturae effatis quoquo modo philosophatur, id ingenue indicare velit ac profiteri, vehementer equidem vereor, ne sic omnes studiorum suorum fructus ipse sibi praecidat. „Quid enim,“ inquit homines illi, quorum usibus suam Codicis S. tractationem *Kantius* maxime videtur destinasse, „quid ad nos haec tua disputatio? Si scriptores divinos de praeceptis atque placitis tuis, quae in medium profers, vere cogitasse, probari nequit, quo tandem iure a nobis postulabis, ut fidem dictis tuis habeamus, vitamque nostram ad ea componamus?“ Satis igitur apparere existimo, quam legi suae hermenevticae circumscriptionem

*Kantius* adiecit, eam solvendis atque expediendis difficultatibus, quas illa, si ad summas recti et iusti ac liciti notiones exigatur, utique habet, nequaquam parem esse atque idoneam. Quocunque enim modo *Kantii* verba intellexeris, hoc semper inde sequetur, ut, qui istis praeceptis convenienter Codicem S. tractet, is non possit non vel fraudis cuiusdam reus fieri, vel laborum suorum spe et consilio suo, ad moralem hominum emendationem spectante, sua ipsius culpa omnino excidere. Tertium quoddam cogitari nequit.

„At enim vero, quamvis tibi facile, inquis, concedo, recte eum fraudis cuiusdam infimulari, posse, qui *Kantianam* interpretandi rationem, qua omnia scriptorum effata ad moralem sensum, revocantur, ad ullum aliud antiquitatis opus, transferre velit, longe tamen aliter in Sacris Christianorum libris res se habet. Hos enim constat non sine peculiari Numinis efficientia et procuratione scriptos esse, hancque ipsam ob causam singula eorum effata pro divinis monitis habenda erunt, quorum verior et plenior sensus, scriptoribus ipsis, qui primum ea proposuerunt, maximam partem obscurus et incomprehensus fuit. Quamquam igitur de morali illo sensu, quem singulis Scripturae dictis tribui debere iudicamus, scriptores ipsos vere cogitasse probari, omnino nequit, nihil tamen obstat, quo minus in sententia nostra perstemus, et Codicis verba,

„dummodo ulla aliqua ratione fieri hoc possit, ad  
 „eum sensum revocari iubeamus; neque etiam  
 „ullam fraudis suspicionem in haec nostra studia  
 „recte cadere existimamus. Nam *sacri* sunt,  
 „quos tractamus, libri, et in hoc ipso, quod  
 „verba puriorem sensum admittunt, quam qui ex  
 „consuetis naturae legibus scribentium menti ob-  
 „versari potuit, certissimum inest indicium, pro-  
 „videntiam divinam singulari quodam modo in  
 „conscribendis his libris fuisse occupatam 51).“  
 Audio; sed idem ego vehementer quoque miror,  
 a critico philosopho aliquid tale potuisse proficisci,  
 et vix persuadere mihi possum, Auctorem ipsum  
 non intellexisse, quantopere hac sua disputatione  
 omnia turbentur et summa imis misceantur. Con-  
 cludit Auctor hunc in modum: sacri sunt publici  
 nostri de religione libri nec sine singulari Numi-  
 nis efficientia atque procuratione conscripti; ergo  
 habent et habere debent sensum moralem, si vel  
 scriptores de hoc sensu non cogitarint. At vero  
*primum* quis non videat, omnem hanc ratiocinatio-  
 nem eo laborare vitio, quod petitionem principii  
 vel *ὑπερὸν προτερον* dicunt Dialectici? Sumuntur,  
 quae demonstrari, et colliguntur, quae sumptio-  
 nem praecedere atque firmare debebant. Scilicet

51) Est haec non a *Kantio*, sed ab alio Viro do-  
 cto, de cuius nomine non constat, profecta ob-  
 servatio, quae legitur in *N. theolog. Journ.*  
 T. III. p. 470. sqq. et p. 483. sqq.

sacrum esse hunc vel illum librum et a Deo profectum, sumi non potest ac debet, nisi antea de eius argumento constet, ut nimirum intelligatur, utrum cum certis rationis nostrae notionibus conveniant et vera sint atque Deo digna, quae praecipiantur, nec ne. Quidquid enim in publicis de religione literis per se non habet moralem sensum, neque rationis iudicio probatur, hoc nec sacrum esse, nec a divina revelatione derivari potest, nisi omnia, quaecunque unquam vulgaris hominum opinio sacra coluit, inconsulte ac temere ad Deum, tanquam auctorem, referre velis. *Deinde* plane non apparet, quo iure et quibus de causis inspirationis notio eo usque extendi possit ac dilatari, ut vel scriptores ipsi verborum suorum vim non omnino affecti esse dicantur. Non enim solum nullum unquam idoneum pro commentum huius veritate argumentum neque ab aliis antiquioribus eius patronis neque ab Auctore nostro prolatum est; sed multa etiam in contrariam partem rectius disputari possunt. Nempe si scriptores Sacri, quid sibi vellent dictata Sancti Spiritus, qui per eos locutus sit, et cuius ipsi amanuenses fuerint, saepe nescierunt, multo minus tirones Christiani, utpote primi lectores, ad quos illorum institutio proxime pertinebat, verum verborum sensum, ex divini Spiritus mente ac voluntate, omnino percepisse censendi erunt; e contrario fieri aliter vix potuit, quam ut, communem loquendi usum secuti, multa male intelligerent,

utque adeo Codex Sacer, puriori religionis institutioni iuvandae et propagandae destinatus, uberrimus errorum fons iis existeret. Quorsum vero haec talia a Deo revelata putemus, quae illo quidem tempore nemo intellexerit nec potuerit intelligere? Nonne sic Deus homines ludificatus esse et recta in errorem induxisse sumitur? quod tu dignum putas divina sapientia? Credat Iudaeus Apella, non ego!

In promptu igitur est, difficultates illas, quibus moralem Scripturae tractationem, si de bona interpretis fide quaeratur, premi paulo antea monuimus, neque *Kantium* ipsum neque eius amicum satis expedivisse, statque adeo sententia nostra, qua fraudis reum iudicamus, quicumque in explicando Codice S. alium, quam qui proprie verbis insit, sensum sciens substituat, nec aperte hoc significet. Atque ita dissensionis meae cum *Illustri* KANTIO causam satis opinor declarasse, et possem sane in his, quae hactenus disputata sunt, acquiescere. Cum enim evictum sit atque demonstratum, per bonam interpretis fidem non licere, moralem sensum Codicis S. dictis tribuere, nisi scriptores ipsi de eo cogitaverint; quid pluribus opus est ad infringenda *Kantiana* praecepta argumentis? et quis ea commendet, quae summa lex moralis fieri vetat? Interim quò melius constet, non temere me a decretis summi philosophi discessisse, alia adhuc paucula subiungam.

*Alteram* igitur causam, cur *Kantianam* Scripturae tractationem admitti probarique nolim, hanc affero, quod illa non modo ad assequendum id, cuius causa commendata fuerit, non apta esse, sed contrarium adeo effectum necessario productura videatur. Consilium, quod spectavit *Kantius* in promulganda sua interpretationis lege, hoc erat, ut Codicis Sacri, ab ecclesia recepti, auctoritas salva staret, utque huius ipsius Codicis adminiculo vera religio et moralis hominum emendatio quam maxime iuvaretur. Esse vero hanc practicae interpretationi virtutem hancque laudem deberi, ut, quam fecerit expectationem, vere expleat, de eo vehementer dubito 52). *Partim* enim ex perpetuo illo studio, omnia Scripturae effata ad moralem sensum revocandi, si vel vis fiat verborum et orationis ingenio, non poterunt non artificiosiores saepe et difficiliores explicationes existere, quam quae ab unoquoque facile intelligantur. Licet hoc videre in variis, ab ipso *Kantio* passim prolatis, interpretationum exemplis, quae adeo sublimia sunt et a communi hominum captu remota, tamque ingeniose composita, ut vix a viris doctis, nedum ab imperita multitudo vera auctoris sententia omnino perspicui possit. Quam vero in animum vim haec talia habebunt, quae mentis acies assequi et capere non valet? *Partim*

52) Cf. *Briefe über d. Perfektib. d. geoffenb. Relig.*  
p. 257. sqq.

etiam pauci erunt, qui verum verborum sensum a morali interprete negligi et alienum commendari non animadvertant, De doctis et rei peritis hominibus hoc sponte intelligitur. Hos nunquam fallit practici interpretis calliditas. Sed nec indoctae et imperitae multitudini eius studia diu latebunt. Quo enim operosior~~em~~ artem practici interpretis partes interdum requirent, ut nimirum purior sensus librorum S. verbis cum quadam specie tribui possit, eo magis naturalis veri sensus, cuius saepe est admirabilis quaedam in vulgo subtilitas, offendetur, quippe nesciens ingeniosas has et artificiose compositas explicationes cum verborum simplicitate conciliare, eoque certius ac citius diffidentia et fraudis cuiusdam suspicio dubios plebis animos occupabit. Huc aliud momentum accedit, quod maiorem adhuc vim ad alendam et augeendam istam fraudis suspensionem habere videtur. Cum nimirum moralis Scripturae interpretatio, ut supra (p. 60. sqq.) docui, nullis certis regulis, quoad modum exercitationis, adstricta sit, sed tota fere ab uniuscuiusvis interpretis arbitrio pendeat; fieri aliter vix potest, quam ut non solum unus doctor ab altero, sed singuli etiam a se ipsi in eodem loco explicando interdum recedant, utque adeo modo hunc modo alium sensum moralem singulis librorum S. dictis tribuant. Quam vero fructuosa sit haec interpretationis diversitas ad perturbandos vulgi animos et ad suscitandos diffidentiae ac suspensionis fomites, aequae facile intelligi-



tur, atque planum est, non posse non plura inde mala enasci, si imperita multitudo imponi sibi a publico doctore, et in aliam saepe, quam quae propria sit scriptoribus, sententiam Codicis S. verba detorqueri, semel animadverterit.

Hinc enim illud *primum* sequi videtur, paucos fore, qui ea, quae non ex proprio Scripturae sensu iudici, sed ulla aliqua ratione eius verbis adnecti intellexerint, curae cordique habeant, et ad se pertinere existiment; adeoque omnem fere fructuum e morali interpretatione producendorum spem illico eversum iri. *Deinde* hoc quoque consequens erit, ut publicus religionis doctor, qui ad *Kantii* praecepta Codicem S. tractasse visus sit, magnum fidei suae et auctoritatis detrimentum faciat, et in posterum laborum ac praeceptorum suorum vim atque efficacitatem sua ipsius culpa valde imminutam videat. Quem enim semel, quamvis bono consilio, sibi imposuisse vulgus animadverterit, huic nec in aliis rebus fidem amplius habebit, et, quod est diffidens ac meticulosum plebis ingenium, fraudis aliquid semper suspicabitur, nec quidquam facile, quod non sponte intelligatur, a magistro persuaderi sibi patietur; certe longum tempus praeteribit, donec mutua inter doctorem et auditores fides, si ab una parte semel laesa fuerit, plane restituatur. *Denique* vehementer etiam verendum est, ne sic omnis librorum sacrorum auctoritas et praeceptorum divinorum fides, quam moralis interpretatio, ex *Kantii* mente

tueri atque firmare debuisset, plane cadat et infringat. „Si enim,“ ita secum cogitabunt indocti homines, „si talibus opus est ad conservandam Scripturae auctoritatem artificiis, ea profecto magna esse non potest. Quid? forsan tota ficta est a viris doctis, huncque in finem excogitata, quo melius ad ipsorum arbitrium actiones nostras regere et cum quadam divinae sanctionis specie nobis imperare possent? forsan multa Deus non ita instituit ac praecepit, ut nobis traduntur?“ Vides facile, quorsum haec ducant; neque etiam recte opponi potest, plus me metuere, quam quod veri habeat similitudinem. Qui enim vulgi mores et ingenium novit, is sine dubio non temere ita a me iudicari fatebitur.

Sed vana sint atque irrita, quam dixi; fac, maiorem esse atque firmiorem librorum S. et legum divinarum apud indoctos homines reverentiam, quam quae illico labefactari aut tolli possit, si male et perversa ratione defendi eam ac sustentari animadversum fuerit; fac igitur, publicae Scripturarum auctoritati a morali interpretatione nullo modo aliquid periculi imminere: nihilo tamen minus stare videtur sententia nostra, quae *Kantianae* Codicis S. tractationi contrarium illi, qui ex auctoris mente esse debuerit, effectum adscribebamus. Iam enim aliud malum a parte opposita metuendum erit. Cum nimirum practicus interpres, de *Kantii* voluntate, non solum omnia

ac singula *Scripturae* effata, sed vulgaria etiam *systematis theologici* dogmata, quae tamen non ex sacris semper literis, sed maximam partem ex male sano patrum ecclesiasticorum ingenio derivata, et symbolorum, conciliorum, legum publicarum, poenarum capitalium et manuum armatarum ope sancita ac propagata esse constat, dummodo ulla aliqua ratione moralem sensum admittant, in usum suum convertere et publice tractare debeat; fieri aliter non potest, quam ut multa in se vana, insulsa, perniciofa et a communi religionis disciplina aliena decreta atque praecepta, quorum memoriam sanior institutio aliquatenus iam extinxerat, solemniter nunc, quamvis mutato sensu, revocentur et pro necessariis religionis capitibus tradantur ac commendentur. Inde vero quid consequens erit? Dogmata ipsa in incautis mentibus inhaerescunt et in amissa iura restituentur, puriorem autem explicationem vulgus aut non intelliget, aut, si intellexerit, non curabit, quod arbitrariam eam esse et fictam animadvertit. Atque ita non solum veritatis ac virtutis studium et purior religionis scientia non iuvabitur, neque mali principii potestas infringetur, neque etiam Dei regnum inter homines fundabitur, sed superstitionis etiam, errorum et praeiudicatarum opinionum imperium longius propagabitur.

In promptu igitur est, moralem sacrarum literarum interpretationem, quicumque eius sit effe-

ctus, utilitatis nihil, noxae vero et malorum largam copiam secum afferre. Confirmat hoc exemplum antiquiorum doctorum e variis gentibus, qui molestam insulfitatis atque ineptiarum speciem a sacris suis remoturi, simulque vanas vulgi de rebus divinis opiniones aliquatenus correcturi, simili, atque *Kantius*, modo publicas de religione literas tractarunt 53). Tantum enim abest, ut studia sua temporum illorum aequalibus probaverint, ut potius omnem suam causam, antea iam suspectam, hac arte suspectiorem adhuc reddiderint. Docti et intelligentes arbitri eos ridebant atque fugillabant, imperita autem multitudo artificiosos ingenii lusus ad summum stupebat, neque tamen vulgari et propriae sibi de rebus divinis cogitandi ac sentiendi rationi vel tantillum valedicebat, quippe parum curans sublimes istas et a sensu suo remotas communium formularum explicationes.

Quae cum ita sint, meas mihi rationes, quare *Kantianam* librorum S. tractationem admitteri atque commendari nolim, satis iam declarasse et probasse videor. Adhuc tamen superest unum aliquid, quod tanquam *tertiam* quandam causam superioribus adicere liceat. Scilicet nihil omnino opus est ad assequendum id, quod voluit

53) Vid. ROSENMÜLLERI *Bemerkungen etc.* p. 122. sqq.

*Kantius*, istis interpretationis artificiis, potest idem consilium alia eaque expeditiore et minus lubrica via melius ac certius teneri; quod ipsa popularis institutionis, qualis ex triginta circiter annis apud nos fuit et adhuc est, historia manifesto docet. Ab illo enim tempore plures eosque honoratissimos ac spectatissimos viros ad eum ipsum, quem commendavit *Kantius*, finem obtinendum intentis viribus et cum insigni fructu adnixos esse, ut videlicet, extirpatis vanis ac praeiudicatis opinionibus et everso superstitionis imperio, puriores religionis notitiae hominum animis instillarentur, utque ad veritatis ac virtutis amorem et ad sinceram mentis emendationem ecclesiae nostrae cives instituerentur, quis est, qui nesciat aut neget? An vero in hoc negotio opus fuit tali, qualem *Kantius* suavit, librorum S. interpretatione? nihil profecto minus; imo vero multi eorum, qui ipsi, si summam rei spectes, idem cum *Kantio* studium persequendum sibi et tractandum sumserant, publice significarunt, nolle se istud interpretationis genus probari et in institutionem popularem temere transferri. Atque ita ex historicis iam experimentis apparet, quam parum publico religionis doctori necessariae sint Kantianae istae interpretationis artes. Clarius tamen hoc intelligetur, si rem ipsam diligentius perpenderit, et de optima populi ad veram religionem instituendi ratione, quae et fraudis suspicionem habeat, nullam, et naturali sua praestantia se ipsa commen-

det, convenerimus. Quatenus illa sit, ex meo quidem iudicio, paucis nunc exponam.

Publicus religionis minister, qui provinciae suae gravitatem sustinere ac tueri cupit, primum omnium vana et futilia dogmata, quae male sedula doctorum ecclesiasticorum curiositas finxit atque excogitavit, a decretis biblicis probe seijunget, haecque commendabit, illa auctoribus suis relinquet. Quodsi fecerit, multum iam profecisse sentiet. Namque haud exiguum esse eorum numerum, quae serior aetas genuinis Christi et Apostolorum praeceptis male et cum manifesto verae religionis detrimento affinxerit, sciunt omnes, qui in historia dogmatum tantum non omnino peregrinantur. 54) Neque etiam de iure, ex quo liceat, systematis theologici dogmata a decretis biblicis plane secernere, ullus scrupulus residebit, si vel hoc unum cogitetur, universam ecclesiae nostrae Protestanticae constitutionem ea thesi, tanquam fundamento suo, inniti, ut omnis auctoritas humana in causa religionis penitus rejiciatur, nihilque aliud, nisi quod ex ipsis sacris libris demonstrari possit, doceatur ac commendetur. 55) Quare hoc primum popularis institutionis

54) Cf. WACHLERI Progr. de Theologia ex historia dogmatum emendanda. Rintel. 1795. 4.

55) Vide ROSENMÜLLERI libellum: Beantwortung der Frage: Warum nehmen wir uns Protestanten?

tionis praeceptum nihil quidquam dubitationis aut difficultatis habere videtur. Plus negotii ea, quae nunc enascitur, quaestio facessit. Nempe cum sacrae literae, ut supra (p. 45. sqq.) vidimus, praeter doctrinam vere divinam alia adhuc quaedam contineant, quae a communi omnium hominum ac temporum usu aliena sunt, nec ad veram religionem pertineant; quaeritur nunc, qua ratione optime caveri possit, ne certis et communibus religionis praeceptis ea admisceantur, et quid a publico doctore fieri oporteat, ut disciplinae suae alumni veritatem absolute declaratam a veritate pro captu et necessitate temporum adumbrata rite distinguere, et ad puriorem religionem sensim adspirare discant? Quae mea sit mentis sententia quodque iudicium de quaestione proposita, ingenue nunc aperiā.

*In universum quidem plurimum proderit, si ante omnia de consilio, causis, iustoque singulorum, qui sacri habentur, librorum pretio, et de peculiari*

*ten? Lips. 1790. 8. imprimis vero consulendus est ECKERMANNI tractatus: Ueber die Gründe, welche uns jetzt berechtigen, ja sogar verpflichten, das kirchliche Lehrsystem ganz von der Lehre Jesu zu unterscheiden; und über die Regeln, nach welchen dieser Unterschied, und was eigentlich Lehre Jesu sey, bestimmt werden muss; in d. theolog. Beytr. Vol. II. P. II. tota.*

primorum lectorum conditione, recta et tum ad veritatis leges tum ad vulgi captum composita institutione, publice atque de industria praecipiat. Cur enim non profiteamur, quod res est, scriptores nimirum sacros in componendis suis libris non nostras sed aequalium suorum rationes proprie curasse et curare debuisse, adeoque multa etiam praecepisse, quae a nostro usu aliena sint, nihilque ad nos pertineant? Cur diffimulemus aut negemus, non omnia Scripturae effata uno eodemque numero habenda esse, doctrinamque vere divinam diligenter distingui debere a decretis temporariis ac localibus, et ab aliis narrationibus aut praeceptis, quorum ne minimus quidem cum ipsa religione nexus intelligatur? Cur potius non libere hoc concedamus ipsique defendamus? Cadet quidem, ubi haec traduntur, horror ille sacer, qui tam diu tamque pertinaciter venerandis istis antiquitatis monumentis adhaesit, et quo factum est, ut vel singulae syllabae et literarum apices pro particula quadam divinae institutionis haberentur, atque universum horum librorum corpus, tanquam volumen coelo delapsum et profundis plenum mysteriis, coleretur; cadet sedulum illud et curiosum, ubique locos communes exsculpandi, studium; cadet (ut uno verbo omnia comprehendam) illa, quam recte et eleganter bibliolatria dixit, cuiusque veram imaginem nuper adumbravit HENKIUS. 56) Neque tamen idcirco me-

56) In *Praefat. ad lineamenta institutt. fidei Christ.*  
p. 19. sq.



tuendum est, ne res Christiana quandam dignitatis iacturam faciat; imo vero cultu ac honore multum augebitur. Partim enim in his ipsis, quae cadent, inest pestiferum quoddam superstitionis genus, quod ferri non oportebat, cum non posset non multas pravas ipsique religioni et virtuti perniciosissimas opiniones gignere ac fovere; partim nunc demum, ubi institutionem divinam ab humana inventione rite distinxeris, atque in aestimando Codicis S. pretio ad ingenium seculi, quo singulae eius partes confectae sint, probe attenderis, *vera* Scripturarum auctoritas et agnoscetur et ab adversariorum calumniis optime vindicabitur. Quare non est, quod ab hac veritatis professione, quae ad publicas de religione literas spectat, timeamus. Postea vero quam popularis doctor disciplinae suae alumnos ita instituit, ut intelligant, non omnia, quae in sacris literis consignata sint, simpliciter ad nos pertinere, et multa cautione opus esse, ne temere a nobis misceantur, quae diligenter sint seiungenda; in eo etiam studium suum occupari debet, ut optimam hos libros legendi et tractandi, iisque recte utendi rationem suos edoceat. Saepius iam, et verissime quidem, monitum est, eam Sacri Codicis lectionem, quae omnia ac singula illius dicta aequo pretio aestimet, neque ullum locorum communium ac planorum delectum faciat, neque etiam aetatis et ingenii scriptorum rationem habeat, imperitae multitudini plus damni quam utilitatis effi-

cere. 57) Quapropter liberalis religionis magister eo diligentius curabit, ut discant sui, *quid* potissimum ex universo Scripturae ambitu legendum sibi sumere, et quo modo ac ordine quaque circumspeditione hoc legere, et qualem inde usum ad vitam suam, mores animique sensus derivare eos oporteat. 58) Quod quidem studium quam maxime iuvabitur, si simul hoc curare velint doctores, ut compendio S. Codicis, quod remota inutili, aliena, ambigua, offensionis plena, et pri-

57) Cf. I. G. BECKERI tractat. theol. quo in quaestionem inquiritur; *utrum lectio literarum sacrarum omnibus omnino Christianis maxime imperitae multitudini valde sit commendanda?* Rostochii. 1793. 4. et ad eum *N. theolog. Journ.* T. II. p. 85. sqq. Inprimis de V. T. lectione hoc, quod dixi, valet; qua de re omnino consulendus est HUFNAGEL in *l. die Schriften des A. T. nach ihrem Inhalt und Zweck bearbeitet.* P. I. Erlang. 1784. 8. Cum hoc ipso momento utilissimum THIESSII opus, quod de recentioribus scriptis theologicis exponit, (*Handbuch der neuern besonders deutschen und protestantischen Literatur der Theologie, von D. Joh. Otto Thiefs.* Vol. I. Lignicii et Lipsiae. 1795. 8.) manibus tractaverim, quasi praeteriens monebo, hunc *Hufnagelii* librum ibi omissum videri.

58) Ad hunc usum egregie composita est I. G. ROSENMÜLLERI Commentatio: *Anleitung zum erbaulichen Lesen der Bibel.* Lips. 1793. 8.

morum lectorum necessitatibus unice accommodata materia, summam tantum eorum contineat, quae vere faciant ad religionis sensum et dignitatem, indoctorum hominum imbecillitati succurratur. 59) - Atque utinam tandem talis epitome, quae, utpote his virtutibus ornata, iure meritoque commendari possit, a Viro quodam docto et interpretationis gnaro post tot desideria pia componatur, et in communem ecclesiae usum publica auctoritate sanciantur! 60). Quae enim existant huius generis scripta, eorum nullum ita comparatum est, ut iustam expectationem expleat, cum auctores illorum, sive consilium, sive argumenti

59) Necessitatem atque utilitatem compendii cuiusdam biblici, si de V. T. libris quaeratur, nemo facile erit, qui in dubium vocare audeat. Cf. *Zwey theologische Bedenken (Noesselti et Koerneri) über die Frage: ob es nöthig und nützlich, außer dem N. T. nur einen Auszug des A. T. zu gebrauchen?* Erlang. 1783. 8. Sed de Novi quoque Foederis voluminibus idem erit pronuntiandum, iisdem fere de causis; quod bene monuit DOEDERLEIN in *Institut. Theologi Christ.* Part. pr. §. 35. p. 113. sqq. ed. 5.

60) De rerum delectu et de universa compendii biblici ratione multa utiliter, vere ac sapienter praecepit Auctor commentat. *Wie muß ein populärer Bibelauszug beschaffen seyn?* in d. *Beitrügen z. Beförder. des vernünftigen Denkens in der Religion.* Partic. VIII. p. 127. sqq.

delectum et compositionem spectes, multis modis peccasse neque omnino certas leges sibi scripsisse videantur.

Haec fere est communis illa familiae Christianae ad veram religionem instituendae ratio, quam, meo quidem iudicio, unam maxime sequi oporteat publicos doctores, si studia sua optimo cuique probare et ab omni fraudis suspicione libera servare velint. Praeterea autem multae adhuc aliae patent viae, quibus vera religio, si minus multum, at aliquatenus certe iuvare potest; illae vero, cum plerumque a temporis et loci opportunitate, et ab hominum, quibuscum agitur, ingeniis pendeant, nos nihil nunc morantur. Ne tamen plane intactum relinquamus, quod propius a re nostra abest, his communibus atque universalibus praeceptis eas adhuc speciales institutionis popularis regulas, quarum potissimum pro concione sacra usus esse videatur, adiungemus. Atque hic prima publici doctoris cura erit, ut, quae veram religionem et moralem mentis emendationem vel non iuvare vel adeo impedire, nihilque ad nostrum usum pertinere cognoverit, haec omnia, quacunque auctoritate nitantur, prudenti silentio, quantum fieri possit, praetervehatur. Ita enim eorum memoria ex hominum animis sensim atque inopinato extinguetur; idque eo magis sperare licet, quo diligentius ea religionis capita, quibuscum vanae istae ac praeiudicatae opi-

niones haud facile conciliari posse videantur, simul tractantur atque exponuntur; quae quidem altera est populi pro concione liberaliter instituendi regula. Nimirum aperte atque directe inveteratos vulgi errores, maxime eos, qui quandam sanctitatis speciem habent, impugnare, raro aliquid prodest, imo multum saepe nocet; contra vero, si fundamenta eorum indirecta correctione atque ita evertuntur, ut vera religionis dogmata, his erroribus contraria, iterum iterumque explicentur, et aliud quasi agendo veri videndi adminicula subministrantur, non potest non perniciofa illarum opinionum vis paulatim infringi penitusque tandem extirpari. 61) Quare hanc gentis Christianae ad sanio-rem Dei cultum, publicae institutionis ope, educandae rationem magnopere commendaverim. Neque minus liberalis religionis doctor, pro concione verba faciens, eam denique legem sibi scribet, ut singulos librorum S. locos, de quibus publice dicendum sit, haecenus semper tractet et persequatur (si quidem hoc recta et commoda ratione fieri possit), quoad maxime valeant ad virtutem, pietatem animique tranquillitatem. Saepius quidem talem locorum biblicorum tractationem, per ipsum eorum argumentum a religionis disciplina alienissimum, omnino locum habere non posse, nisi verbis vim inferre et a pro-

61) Cf. HOTTINGERI Oratio nota 48. citata.

prio orationis sensu temere recedere velis, lubenter concedo; sed praeterquam quod hoc iudicium tantum de nonnullis universi Codicis particulis valeat, neque ullo modo ad ipsa divinae institutionis placita, ab omnibus aliarum rerum involucribus atque integumentis purgata, transferri debeat, praeterea multa quoque alia in sacris literis leguntur, quae, quamvis per se nullo necessario nexu cum ipsis religionis decretis cohaerere videantur, nihilo tamen minus oratoribus, qui quidem iis recte uti sciant, largam utilissimae disputationis materiem suppeditent, et ad hunc ipsum, qualem significavi, usum bene converti possint; de quibus etiam unice nunc loquor. Pertinent autem huc imprimis eae Bibliorum partes, quae sunt *historici* argumenti; de quarum quidem pretio, tractatione et cum religionis disciplina nexu, cum non una sit Virorum doctorem sententia, singularim adhuc, quamvis breviter, erit exponendum.

KANTIUS nimirum, ut omnia, quae solam empiricam fidem efficiunt, neque necessariis rationis practicae notionibus ac decretis innituntur, e religionis disciplina, tamquam alienas appendiculas, exterminari, nec nisi quoad necessaria sint fidei moralis adminicula, tolerari et ad tempus retineri vult ac suadet, ita nominatim *historicis* librorum S. locis nullum omnino pretium in

causa religionis statuit. 62) Neque ego diffiteri possum, hanc sententiam mihi quoque *hactenus* se probasse, ut et ipse religionis et theologiae Christianae disciplinam ab *historia biblica* nihil pendere, et utramque rectius seiungi existimem. 63) Ita autem statuo, non quasi de fide huius historiae dubitem, sed quod eam, quamvis fide dignissimam, nullo necessario nexu cum ipsis religionis Christianae placitis cohaerere persuasum mihi est. Haec enim per se stant, et ad mentem animumque hominum pertinent; *historia* autem, qua talis, h. e. quatenus res in facto positae simpliciter exponit, solam memoriae vim exercet, cuius quidem in causa religionis nullae sunt partes, certe non praecipuae. Neque etiam religionis capita

62) *Die Religion innerh. d. Grenz. d. bloßs. Vernunft.* p. 44. nota \*) p. 108. et p. 152.

63) Eandem sententiam professi sunt praeter alios, AMMON, tum in *Diar. theol.* T. III. p. 247. sqq. tum in Progr. aditiali, quo inquit: *quatenus disciplina religionis et theologiae Christianae pendeat ab historia Iesu Christi.* Goetting. 1794. 4. *Scriptor anonymus* in HENKII Magazin. T. I. p. 392. sq. cl. p. 362. LOEFFLER in *d. Gutachten über einige wichtige Religionsgegenstände.* p. 20. sqq. et p. 79. sqq. Legi etiam merentur, quae de hac quaestione commentatus est PLANCKIUS in *s. Einleitung in die theolog. Wissensch.* T. II. p. 463. sqq.

haecenus a rebus gestis pendent (quod multis videtur), ut ea ex his vel rectius informari, vel ambitu suo dilatari, vel etiam novis rationibus fulciri possint, cum a *singulis* factis ad *communia* rationis praecepta non valeat conclusio. Quare si de origine, propagatione et fati primis Christianae religionis vel nihil plane constaret, neque etiam de auctore eius in sacris literis quidquam consignatum esset, multas quidem easque fat graves, hanc rerum utilissimarum iguorantiam dolendi causas haberemus, neque tamen eam, quod sic necessaria quaedam ipsius religionis pars deficeret, dummodo *doctrinae*, a Iesu Christo traditae, vera et perfecta scientia ad nostram aetatem pervenerit. 64) Atque ita *Kantius*, historica librorum sacrorum decreta ad religionem obiective per se consideratam nihil pertinere, recte omnino iudicavit. Quod quidem quamvis lubenter largior, de eo tamen, quod inde colligit Vir summus, non possum sententiae eius subscribere. Fretus nimirum hoc suo de historia biblica, ab ipsa doctrina Christi utique secernenda, iudicio, quidquid rerum gestarum sacrae literae prodiderunt, ita fere semper tractat vultque tractari *Kantius*,

64) Cf. LOEFFLER in praefat. ad vernaculam libri francogallici de *Platonismo Patrum* versionem, ab ipso curatam (*Versuch über den Platonismus der Kirchenväter. 2te Aufl. Züllichau. 1792. 8.*) p. IX. sq.



ut omnis facti historici species tollatur, et scriptorum verba ad ullum aliquem sensum, qui purae rationis decretis conveniat et innitatur, revocentur aut detorqueantur, adeoque historia empirica in rationalem, externa in internam quasi mutetur. Certe hanc tractationem, ut de aliis locis nunc taceam, ea historiae biblicae pars experta est, quae de *filio Dei*, Patris ad homines legato, sive (quae est vulgaris vulgarium Theologorum dialectus) de *incarnatione verbi divini* exponit. *Kantio* enim *filius Dei* nihil aliud est, quam *idea vere pii et boni hominis, in personae formam transfusa*; (*Die personifizierte Idee des guten Prinzips, das Ideal der Gott wohlgefälligen Menschheit*); 65)

- 65) l. l. p. 67. sqq. Mira res est et notatu digna, quod philosophica KANTII de *filio Dei* disputatio, verborum certe similitudine, accurate iis conveniat, quae *Fratres liberi spiritus*, fanatica quaedam et turbulenta Seculi XIII festa, de eodem commentum sunt. Nam quae MOSHEMIUS in *institutt. historiae eccles. antiquae et recentioris*. Helmstad. 1755. 4. p. 552. sq. nota p) ex secretioribus illorum hominum libris excerpfit, ea *Kantianis* formulis ex affe sere respondent. Rara profecto et inaudita rationis philosophantis cum furore fanatico consensio! Quam ipsam neque ullam aliam ob causam paucula quaedam ex MOSHEMIO huic transcribere iuvat: *Omnis homo vere pius et bonus est unigenitus Dei filius, quem Deus ab aeterno genuit: — Deus gignit adhuc filium suum unigenitum et eundem gignit filium.*

ficque adeo, quod tamquam rem in facto positam tradunt libri sacri, tractat ille tamquam notionem quandam mentis humanae. Iam vero etsi non ita caecus sum et hebes ad intelligendum, ut inventionis ac compositionis artificium ingenii acumen in hac *Kantiana* historiae biblicae tractatione non videam et admirer, nolim tamen eam recipi atque vel popularibus doctoribus, quam expriment et sequantur, commendari; 66) idque cum propterea, quod non intelligo, quid boni ab hac nova et inaudita plane *historicos* S. Codicis locos tractandi ratione, quae ipsa sua insolentia unumquemque facile offendat, sperari possit, tum imprimis eam ob causam, quoniam historiae biblicae, si vel ad literam et ex proprio verborum sensu ea explicetur, magna tamen est, maxime in institutione populari, utilitas 67) dummodo do-

*quem ab aeterno genuit: — Quod Scriptura dicit de Christo, id de quolibet homine divino et bono verum est: — Quilibet homo perfectus est Christus per naturam: etc.*

66) Nec AMMONIO haec historiae biblicae tractatio omnino placuisse videtur; v. *N. theolog. Journal*. T. I. p. 437.

67) V. ROSENMÜLLERI *Bemerkungen etc.* p. 95. sqq. Hoc idem AMMON quoque concedit; II. nota 63. II. Universas quasdam de historiae bibli-

ctoris in hac re occupati studia sapientia et iudicio regantur. Quo enim iure historiam universae vitae magistram dixerunt, eodem et maiori etiam biblicae historiae hoc nomen convenit. Eam enim, quippe cum simplici sua et plana rerum gestarum expositione gravissima fidei moralis capita non modo una complectatur, sed propius etiam, quam alias facile possit fieri, menti humanae admoveat et sensibus quasi subiiciat, hocque ipso eorum ad animum vim multum augeat, eam, inquam, egregium esse verae religionis virtutisque inter homines, maxime in imperita et subtilioris meditationis insueta plebe, iuvandae ac promovendae instrumentum, et res ipsa et quotidiana experientia satis superque docent. Neque tamen singulae historiae biblicae partes pariter aequaliterque ad hunc usum aptae sunt; quod lubenter concedo. Opus igitur est publico doctore in hac re, ut iam dixi, sapientia et iudicio, tum ut caveat, ne ex singularibus quibusdam et a communi usu alienis, iisque offensionem aliquam saepe habentibus actionibus, quas referunt sacri commentarii, et ex aliis rerum insolitarum narrationibus pravae ac perversae vitae morumque regulae deriventur, tum ut iustum delectum facere, et quotiescunque de historicis Scripturae locis publice

cae pretio observationes proposuit NOESSELTUS in *f. Anweis. z. Bild. angel. Theologen*. T. II. §. 9—15. p. 15. sqq. ed. 2.

dicendum sit, eos hactenus semper tractare sciat, quoad maxime faciant ad pietatem, virtutem animique tranquillitatem 68) Atque huius quidem, quam ultimo loco commemoravi, tractationis materiem satis multam et utilissimam inprimis historia Iesu Domini suppeditat. 69) Neque enim haec eo solum nomine praedicanda est, quod theoretica religionis Christianae dogmata optime illustret et ante oculos quasi exponat, quodque plane egregium sit ab empiricis cognitionibus ad moralem fidem homines paulatim perducendi adminiculum, sed praeterea etiam a singulari, quam ad emendationem, probitatem beatitudinemque Christianorum habet, vi atque efficientia merito laudari debet, cum nimirum et pietatis ac virtutis, quam imitemur, 70) et felicitatis iis nexae, quam influentes animo confidamus et tranquillemur, per-

68) Uberius haec exposuit NIEMEYER in *J. popul. u. pract. Theologie*. §. 148—151. p. 215. sqq. ed. 3.

69) Cf. omnino DOEDERLEINII Commentt. IV. *de historiae Iesu tenendae tradendaeque necessitate ac modo*, in *Opuscul. theolog.* Ienae, 1789. 8. p. 1. sqq.

70) Quod quomodo fieri possit ac debeat, accuratius definivit venerandus CAR. AUG. THEOPH. KEIL in dissert. *de exemplo Christi recte imitando*. Lips. 1792. 4.

fectissimam absolutissimamque imaginem nobis exhibeat. Quare magnum utique manet huius historiae pretium et insignis quaedam, maxime in institutione populari, utilitas, si vel ipsam religionis Christianae disciplinam ab ea unice pendere non concedatur, quin potius omnem historicam fidem ad extremum penitus exspirare et in moralem fidem transire debere iudicetur ac defendatur.

Sic igitur — ut iam in viam revertamur, a qua paululum nos abduxerat diversorum, de historiae biblicae pretio et cum religionis disciplina nexu, iudiciorum cognitio — *tertiam* quoque causam, quare KANTII de morali sacrarum literarum interpretatione praeceptis adsentiri non possem, satis mihi declarasse videor atque explicuisse; et sponte iam apparere existimo, nihil omnino publico religionis doctore, qui disciplinae suae alumnos ad veriores Dei cultum educare velit, in institutione sua, siue universe ea spectetur, siue etiam concionum sacrarum potissimum ratio habeatur, opus esse *Kantianae* interpretationis artificiiis, cum alia eaque expeditior et minus lubrica via (quae quidem videtur) ad eundem, quem KANTIUS sibi proposuerit, finem adsequendum, pateat. Adhuc tamen unus quidam restat scrupulus, qui, nisi solvatur, huius meae sententiae veritatem dubiam reddere incertamque facile possit videri. „Qui enim — ita fere dixeris —

„publicus religionis minister, pro concione verba  
 „faciens, interdum non necesse habeat, *Kantia-*  
 „*nam* interpretandi rationem sequi, si v. c. su-  
 „premi magistratus et qui praesunt ecclesiis su-  
 „per eiusmodi S. Codicis dictis, quae ineptum  
 „vel adeo improbum sensum fundant, qualia sunt  
 „Ps. LIX, 11—10. Ps. LXIX, 23—29. Ps. CIX.  
 „orationes solemnes haberi iubeant? Namque si  
 „proprium talium locorum sensum premere, et  
 „v. c. diris illis Psalmistae execrationibus ita in-  
 „haerere vellet popularis doctor, ut de gaudio  
 „Christiani hominis, ex caede hostium suorum et  
 „poena ab iis sumpta oriundo, diceret, id profe-  
 „cto non esset *ἀνθρώποις λαλῆιν ὀικοδομῆν καὶ παρα-*  
 „*κλήσιν καὶ παραμυθίαν* (1 Cor. XIV, 3.), imò  
 „verò *τιθεναὶ προσκομῖα τῷ ἀδελφῷ ἢ σκάνδαλον*  
 „(Rom. XIV, 13.). Sin scriptorem sacrum, vi-  
 „rum *θεοπνευστον*, impugnare et magistratum risui  
 „exponere mallet, hoc item non liceret, neque  
 „etiam commodum esset atque utile. Quid igitur  
 „aliud restat, quam ut posthabito grammatico  
 „verborum sensu puriorem sententiam auctoris  
 „menti tacite subiiciat?“ At enimvero alia etiam  
 „restat ex his difficultatibus sese expediendi ratio;  
 „haec nimirum, non ut proprium verborum sen-  
 „sum dissimules aut detorqueas, sed explices et de-  
 „finias, quantum opus sit, simul vero ex tempo-  
 „rum illorum rationibus et peculiari scriptoris con-  
 „ditione utcumque excuses, neque omnino diu ei  
 „innaereas, quin potius prudenter atque inopinato  
 „oratio.

orationis filum ad ea statim deflectas, quae ad sanio-rem religionis scientiam, virtutem animique tranquillitatem magis sint frugifera. 71) Et sane est, quod *hanc* offensionis scopulos in re nostra vitandi rationem *illi* multum praeferam, cum ea sumpta non modo nulla neque scriptori neque iis, quorum iussu de talibus locis publice exponendum est, fiat iniuria, sed veritatis etiam et bonae fidei salva maneat atque inviolata auctoritas; quod secus erat in illa. Ut igitur nusquam omnino, ne in hac quidem, de qua modo dictum est, scrupulosa et difficili sacri oratoris causa; quae vero ipsa vix unquam aut certe perraro tantum locum habebit, aliqua *Kantianae* interpretationis necessitas apparet, ita, si vel concedi debeat, posse per improvisas quasdam temporis locique rationes hanc necessitatem interdum obvenire, nihil tamen adversus nos inde sequetur. Namque id nihil aliud erit, quam singularis quaedam a communi regula exceptio, quae quidem eo minus quidquam momenti habet, quo rarius publico doctore, qui eandem aut similem, atque ipsi

71) Idem fere de hac quaestione indicium AMMON (*N. theol. Journ.* Vol. III. p. 496.) et POELITZ (*Kritik der Religionsphilosophie und Exegese uns. Zeitalters.* p. 399. sq.) tulerunt. Uterque enim puriorem sensum scriptorum divinorum verbis ab oratore sacro non *obtrudi* aut *inferri*, sed *ad- necti* vult ac suadet.

leviter perstrinximus, gentis Christianae ad veram religionem instituendae rationem sequitur, aliquid tale accidere potest, ut illam admittere atque usurpare cogatur.

Quapropter verum utique manet, quod antea posui, nimirum ad obtinendum id, quod KANTIUS voluerit, non solum non opus esse *moralis* five *practicae* sacrarum literarum interpretatione, sed planiorem et minus lubricam viam, quae certius ac tutius ad eundem finem perducatur, patere. Quod si ad haec illud nunc addatur, de quo fusius antea disputatum est, neque per bonam interpretis fidem licere, ad KANTII exemplum et voluntatem Codicem S. tractare, neque, si liceat, satis aptam fore hanc tractationem adsequendo auctoris sui proposito, cum ea non possit non contrarium adeo, quam qui proprie esse debuerit, effectum saepius producere; non vereor, ne quis propterea, quod summi Philosophi de libris sacris interpretandis praecepta reiicere atque impugnare ausus fuerim, inconsideratae cuiusdam five temeritatis five cupiditatis reum me faciat. Neque etiam talis inculpatio recte in me cadere videtur, quippe qui optime mihi conscius sim, partim, quidquid scripserim et iudicaverim, illud me diligenter antea, quam literis consignarem, momento suo ponderasse, partim non aliunde, quam ex ingenuo veritatis investigandae ac detegendae studio omne meum



qualecumque de universa hac quaestione iudicium  
pendisse. Atque huius mei ab omni partium  
studio alieni et solo veritatis amore ducti animi  
illud etiam haud leve indicium haberi potest,  
quod non solum, quae *Kantianae* librorum sacro-  
rum interpretandorum praeceptioni *recte* opponi  
posse viderentur, sed etiam, quae *minus commode*,  
mea quidem sententia, a viris doctis contra eam  
disputata essent, aperte significaverim, eoque ipso  
apud utramque disceptantium partem in invidiae  
atque offensionis discrimen sponte me obtulerim.  
Caeterum hic idem veritatis amor illud quoque  
nunc me profiteri iubet, studium ipsum et consi-  
lium KANTII, quod per totam suam de religionis  
disciplina commentationem persecutus est, quod-  
que etiam praeceptorum de morali sacrarum lite-  
rarum interpretatione ansam praebuit, utique  
laudandum esse et mihi quoque admodum probari,  
quamquam nonnulla consilii huius adsequendi in-  
strumenta, et nominatim illud, de quo haecenus  
vidimus, admitti atque vel popularibus doctoribus  
commendari nolim. Etenim ex singulis fere libri  
*Kantiani* paginis manifesto apparet, nihil aliud  
venerabilem hunc Senem propositum sibi habuisse,  
quam ut extirpatis vanis ac praeiudicatis rerum  
sacarum opinionibus, everso caecae fidei, super-  
stitionis et vitiositatis imperio, detectisque simu-  
latae pietatis latebris, ad puriorem religionis  
disciplinam, quae sinceram mentis emendationem,  
virtutis amorem, vitaeque probitatem ac honesta-

tem gigneret atque foveret, hominum animos institueret. Quis vero haec non laudet? quis studiis his et conatibus non applaudet faveatque? quis igitur talem Virum non magni faciat ac veneretur, si vel singula, quae iste commendaverit, propositi sui exsequendi adminicula probari nequeant? Sed haec de KANTIO dicta sufficiant.

Quemadmodum vero huius summi Viri de morali librorum sacrorum interpretatione monitis atque consiliis non assentior, ita multo minus laudare possum eorum studia, qui, KANTII auctoritate abusi et velle se eius rationem in interpretando exprimere professi, licere sibi putant, scriptorum divinatorum verbis quemcumque alium, quam qui verus sit, sensum tribuere, simul vero, ut causae suae quendam colorem inducant, quo vel eruditis lectoribus, si Diis placeat, eam commendent, ratiunculas etiam undecumque collectas interpretationum suarum monstris suggerunt. Ista enim interpretandi ratio (si eam hoc neque potius calumniae aut certe ludificationis nomine appellari fas est), quo facilius solo arbitrio, quod omnes verae interpretationis leges funditus tollit, inniti et a libidine sive licentia proxime abesse intelligitur, quoque simul est fallacior, eo minus ferri, quin imo fortiter repudiari et auctoribus suis reddi ac remitti debet. Ad hos autem praeter alios plures pertinet imprimis PENZENKUFERUS quidam, qui nuper duobus speciminibus

propositis aliquam talis interpretationis promulgidem dedit, quam maioris molis opus, quod copiosius hoc argumentum persequeretur, mox expecturum erat. 72) *Alterum* ex istis speciminibus (lib. infra laud. p. 379—383.) locum quendam Evangelii Iohannis, Cap. IV, 24. tractat; *alterum* (p. 383—388.) de formula celebratissima: βασιλεία τοῦ Θεοῦ: qua non alia est facile in N. T. libris frequentior et vero etiam magis controversa, 73) exponit. Atque de hoc paucis nunc videamus.

72) *Ueber einige Stellen im Neuen Testament, nach Kantischer Erklärungsmethode, Probe einer grössern Arbeit. Von C. W. PENZENKUFFER, in Nürnberg; in HENKII Magazin. T. III. p. 379. sqq.*

73) Vide scriptores in commentatione nostra: *Ueb. d. Aeusserungen Jesu von d. Reiche des Messias; in HENKII Magazin. Vol. II. p. 359. sqq. laudatos, quibus adde IOH. IAC. HESS Vom Reiche Gottes. Turici, 1780. 8. GOTTL. CHR. STORR differt. de notione regni caelestis. Tubingae, 1782. 4. GEO. HENR. LANG Zur Beförderung des nützlichen Gebrauches des W. Abr. Tellerischen Wörterbuchs des N. T. sub voce Reich. Part. IV. p. 63—85. CAR. CHR. FLATT differt. de notione vocis βασιλεία των ἁγίων, ex ipsis Christi dictis eruta. Tubingae, 1794. 4. iterum typis excusa in Comment. theolog. Vol. II. p. 421. sqq.*

Ex doctissimi *Penzenkufferi* sententia βασιλεια τς θες explicari debet per βασιλεια τς πνευματος τς θες, idque hanc ob causam, quod in sacris utriusque aetatis et generis monumentis tum יהוה pro יהוה ירהו, tum θεος pro πνευμα τς θες haud raro ponatur, testantibus quidem locis his: Iudic. XVI, 20. cl. XIV, 6. 19. XV, 14. 1 Sam. XVI, 13. cl. v. 18. Ephes. V, 5. cl. IV, 30. V, 9. Ephes. III, 19. cl. v. 16. Ephes. IV, 24. cl. V, 9. Iam vero — ita pergit Auctor — formulae illi וקרן הוה five πνευμα τς θες ex usu loquendi Iudaico principalis ac plena notio inest haec, ut *virtutem sapientiae iunctam* significet. Hinc igitur βασιλεια (τς πνευματος) τς θες idem erit ac βασιλεια της σοφιας (h. l. i. q. της συνεσεως) και της δικαιοσυνης, h. e. vis atque efficacia studii hominum, quod virtute ac sapientia continetur et occupatur, (*die Wirksamkeit des Geistes der Weisheit und Moralität*,) five imperium rationis practicae propensaque animi ad praecepta eius exsequenda voluntas (*die Herrschaft der practischen Vernunft, die Wirksamkeit des sittlichen Vernunftgeistes*). Similiter nunc iuxta eandem normam diversae illae N. T. locutiones, quae ex hac formula natae sunt et compositae, explicantur. Sic v. c. εισηρχεσθαι εις την βασιλειαν τς θες five των ερανων ex Auctoris mente verti debet: imperium rationis practicae agnoscere et revereri, reipublicae ethicae universalis five ecclesiae invisibilis civem fieri; ευαγγελιζεσθαι την βασιλειαν τς θες

est: institutione et exemplo obedientiam rationis practicae legibus praestandam aliis commendare; ἡγγικεν ἡ βασιλεια των ερανων significat: virtus ac sapientia, five ex *Kantiana* dictione, bonum principium imperii sui in hominum animos exercendi initium ponit, ethica Dei civitas conformari incipit; et sic porro.

Exposui fere et exemplo quodam illustravi potiora momenta, quae ad declarandam novae sacrarum literarum interpretationis, qualem ex *Penzenkufferi* mente esse oporteat, vim ac naturam valeant; atque hac ipsa brevi et simplici enarratione anticipatum meum rei istius iudicium intelligentissimo cuique ita iam probasse mihi videor, ut plura addere vix opus sit. Etenim *primum*, quis non statim, ubi haec legerit, talem Codicis S. tractationem mere arbitrariam esse et a vera interpretatione toto caelo distare intelligat? Certe non minutis difficultatibus constrictum et paene iugulatum se sentiat Auctor, si quis eum rationes postulet, cur nomen *Dei* in formula nostra nominatim et unice per πνευμα τα θεα explicari, hocque ipsum eo nominatim sensu, ut sit *virtus sapientiae iuncta*, capi debeat, cum tamen, si ex solo linguae usu nec nisi ad grammaticas leges res iudicetur (ut visum est Auctori), multi etiam alii formulae huius explicandae modi cogitari possint. Sic v. c. notus est Hebraismus, ex quo nomina Dei aliis vocabulis, cum adiectivis tum substan-

tivis, ita iunguntur, ut summam rei alicuius praestantiam et perfectionem sive gradum rei superlativum exprimant. 74) Cur igitur ἡ βασιλεια τῶ Θεοῦ non vertamus *regnum amplum, potens et florentissimum*? Sic etiam satis constat, רִיחַ הַקֹּדֶשׁ et πνευμα τῶ Θεοῦ in sacris literis multas adhuc alias, quam quae Auctori placuit, significationes habere. 75) Itaque si vel concedamus (quod tamen per alias rationes fieri nec potest nec debet), nomen *Dei* in formula nostra per πνευμα τῶ Θεοῦ utique explicandum esse, cur vero dictioni huic eum nominatim sensum tribuamus, quem Auctor vult, et cur non alium? Porro cum ἡ βασιλεια τῶ

74) Vide VORSTII *Commentarium de Hebraismis N. T.* Cap. XVI. p. 387. sqq. ex edit. Fischeri. GLASSII *Philologiam Sacr.* T. I. p. 44. sqq. ex edit. Dathii. FISCHERI *Proluss. de vitiis Lexicorum N. T.* Lips. 1791. 8. p. 232. sqq.

75) Vide SCHLEUSNERUM in *Lexico in N. T.* sub voce πνευμα. T. II. p. 541. sqq. et scriptores ibi citatos, quibus addi potest HEZELIUS in comment. vernac. *Entwicklung der schweren biblischen Begriffe Geist und Fleisch*: quae primum inserta est *Eius Schriftforscher.* T. II. (Gießae, 1793. 8.) Partic. I. p. 17. sqq. tum denuo excusa in GEBHARDTI *Biblisch. Wörterbuche.* T. II. (Lemgoviae, 1794. 8.) p. 511. sqq. et p. 694. sqq. denique separatim etiam, quantum scio, venditur.

3<sup>is</sup> non uno N. T. loco (v. c. Luc. XIII, 29. cl. Matth. VIII, 11. Matth. XIX, 24. cl. v. 23. etc.) cum formula: ἡ βασιλεια των ερανων: permutetur, ερανos autem inter alia etiam de caelo nubium, atmosphaera sive ima aëris parte dicatur, (v. c. Luc. XII, 56. IV, 25. Matth. XVI, 1. 2. 3. Iac. V, 18. cl. v. 17. etc.) quid impedit, quo minus *regnum aërium* sic describi statuamus? Usus linguae in se hanc explicationem admittit; cur igitur suam praeferre Auctor maluit? et quae subest ratio? Possent vero ad easdem, quas *Penzenkufferus* secutus est, leges multa adhuc alia interpretationum monstra componi, si res tanti esset; sed taedet me huius negotii, et sufficiunt etiam haec, quae attuli, exempla coram filio meo, ut nimirum, quam mere arbitraria sit omnis ista libros sacros tractandi ratio, quantumque a vera interpretatione remota, ostendatur. Atque hinc illud etiam facile intelligitur, talem in interpretando libidinem non ineptam solum esse et plane inutilem ad veram cuiuscunque scriptoris sententiam eruendam, sed omnia etiam turbare et dubia incertaque reddere; quae quidem altera est dissensionis meae et vituperationis causa. Auctor ipse hoc quodammodo sensisse videtur. Namque non negat, imo aperte profitetur (l. l. p. 385.), utrum *verus* ille sit scriptorum divinorum sensus, qui ex sua interpretandi ratione efficiatur, nec ne, id se nec posse pro certo affirmare, nec etiam admodum curare, quin potius sola quadam interpre-

tationis probabilitate acquiescere, cum persuasum sibi habeat, eam communem esse omnium omnino interpretum sortem, ut, quid quovis loco *pro certo* dent ac definiant, ipsi non habeant. Dura sane et molesta oratio, quae si aequae vera esset atque insolens est, non posset non universam interpretum vim summo pudore afficere, eorumque artem in ignominiae et contemtionis discrimen adducere. Sed bona verba, quaeso! Non est, quod consternati interpretes animum despondeant; nam utique possunt arti suae confidere et de interpretationum suarum veritate certi esse, modo ne *Penzenkufferi* vestigiis ingrediantur, sed cum grammatica interpretatione *historicam* coniungere sciant, ita quidem, ut non solum, quid singulae loquendi formulae *per se*, sed quid eo nominatim tempore, quo quisque liber consignatus est, et inter illos nominatim homines, ad quos scriptio proxime pertinuit, significare potuerint et vere significaverint, quaerant, idque ipsum non aliunde, nisi ex aetatis illius dialecto, historia, moribus, institutis atque opinionibus illustrent ac definiant. Quid enim in dubium adhuc venire et plenam animi persuasionem de interpretationis veritate retardare possit, ubi ex *historica* hac interpretandi ratione scriptoris sententia constituta fuerit, equidem certe adeo non intelligo, ut potius haec mihi via unica esse videatur, qua et universe genuinus veterum auctorum sensus singulis locis *recte* elici, et inprimis etiam, quid formula nostra: ἡ βασιλεία



τὸ θεὸν five τῶν ἁγίων five τὸ Ἰησοῦ Χριστοῦ: in N. T. libris *vere* significet 76), et quid non, *certo* explorari possit. Contra si solum arbitrium in interpretando sequi, sensumque verborum ad quamcumque aliam normam, quam ad historicae interpretationis leges, constituere malis (quod quidem *Penzenkuffero* placuit), omnia turbentur incertaque redantur, et vera scriptoris sententia, quam expedire interpretis erat, adeo intricetur ac pervertatur, ut nec vola nec vestigium eius appareat, necesse est. Quare profecto sat graves sunt causae, quae nos eiusmodi praecepta hermeneutica repudiare et auctoribus suis relinquere iubeant;

76) *Tres* autem sunt, si quid video, formulae huius in N. T. libris significationes, quae quidem grammaticae et historice probari possunt. *Aut* enim significat *tempora Messiae universe omnemque muneris, ab ipso inter homines peragendi, ambitum; aut* nominatim dicitur de solemni et glorioso illo regno, quod *Messias*, ex Iudaeorum opinione in his terris conditurus erat, deque felicitate in hoc regno speranda; aut denique ipsam religionem et ecclesiam Christianam (certe aliquoties in sermonibus Iesu) denotat. Quae praeterea, a SCHLEUSNERO etiam (*Lexicon in N. T.* sub voce βασιλεία T. I. p. 392. sqq.), constituuntur significationum genera, ea praeter certas rationes sumpta esse aut saltem supervacanea videntur. Caeterum uberiores rei ipsius et argumentorum expositionem hunc locum non capere facile intelligitur.

ad quas *ultimo loco* hoc etiam referri debet, quod talis interpretandi ratio multorum facile malorum ansam praeberet, ipsique rei Christianae variis modis perniciose fieri possit. Cum nimirum Auctor in eo a KANTIO recedat, ut videri velit non tam philosophantis theologi, quam potius interpretis, qui proprie dicitur, personam agere, neque interpretationes suas simpliciter ponat et ad imperitiae tantum multitudinis usum commendet, sed ratiunculas etiam philologico-exegeticas adiiciat, quibus causam suam vel eruditis lectoribus persuadeat; facile intelligitur, hanc rationem *Kantiana* multo fallaciorem esse, et maiorem speciem habere, quae incautos doctiorum etiam hominum maximeque tironum animos opinato citius decipiat. Iam vero quid consequens erit, si hoc interpretandi genus latius se diffundat, sensimque plures amicos nanciscatur? nihil profecto aliud, quam ut vanorum interpretum et clamatorum imprudentum (tales enim plerique sunt, qui de re aliqua, cuius tamen indolem non accuratius cognoverunt, philosophari volunt,) numerus in dies crescat, et ad extremum, quid Iesus et Apostoli vere docuerint, quidque male sedula importunorum interpretum curiositas falso ac temere iis affinixerit, nemo amplius sciat. Non vanum esse hunc metum, et res ipsa et imprimis etiam varia signa atque indicia, quae hac nostra aetate conspiciuntur, nimium quantum docent. Quis enim non stupeat et indignetur cruda illa atque inepta

de rebus exegeticis deque universa religionis Christianae vi atque indole iudicia, quae his nostris diebus ab interpretibus philosophantibus (quales scilicet haberi volunt) passim sparguntur 77)? At vero quatenus subest horum iudiciorum ratio? *Quisque nimirum philosophus videri cupit, sed pauci tantum sunt, qui rei, de qua philosophentur, naturam diligentius perspexerint.* Quam satius igitur foret, si nemo de re aliqua, nisi accuratam eius scientiam comparaverit, iudicium sibi sumeret, sique inprimis philosophantes nostri interpretes sibi persuaderent, non decere de scriptoris sui opinionibus ac decretis ante philosophari, quam verus et genuinus verborum sensus *grammaticae et historice* constitutus fuerit! Certe haec est antiquioris philosophi, *Ammonium* dico, *Hermeae* filium, sententia, qui perquam commode has interpreti leges scripsit 78): 'Ο ἐξηγου-

77) Sic nuperrime *quidam* persuadere nobis voluit, omnem nervum et cardinem religionis Christianae *miraculis*, quae *stricto sensu* dicantur, contineri, nec posse quemquam ac debere Christiano nomine ornari, qui non in hac persuasione acquiescat. O profundam et inauditam sapientiam!

78) Ἀμμωνίου τοῦ Ἑρμείου σχολία τῶν Ἀριστοτέλους κατηγοριῶν. Venetiis, ap. Aldum. 1503. fol. pag. 3. signata *AAiii*. Plures nimirum Commentarii in hoc uno Volumine continentur. Debeo autem huius loci notitiam *Illustri* EICHHORNIO,

μενος ὀφείλει μὴτε κατ' εὐνοϊαν ἐπιχειρεῖν τὰ κακῶς λεγομένα συνίσαν, καὶ ὥς ἀπο τριπόδος ταυτὰ δεχέσθαι, μὴτε τὰ καλὰ κακότητος δεχέσθαι κατὰ ἀπεχθείαν, ἀλλὰ κριτῆς ἀπαθῆς τῶν λεγομένων ὑπαρχεῖν· καὶ πρῶτα μὲν, τὴν διανοίαν τὰ ἀρχαῖς σαφηνίζειν καὶ ἐρμηνεύειν τὰ αὐτῶ δοκυντὰ· ἔπειτα, τὴν παρ' ἑαυτῶ ἐπιφέρειν κρίσιν. *Interpretem oportet neque perperam dicta ex benevolentia commendare studere et tamquam a tripode profecta accipere, neque recte dicta ex odio perverse reddere, sed sine cupiditate, quae scripta sunt, aestimare; et primum quidem sententiam antiqui auctoris explanare, quaeque huic visa fuerint, exponere, deinde demum suum ipsius iudicium addere licet.* Similem in modum ERNESTI quoque, summus ipse interpres, praecepit 79), in interpretatione ipsa, inquit, nihil aliud quaeritur, quam quid dictum sit, non quale sit, aut quam vere dictum.

Sed mitto has philosophantium interpretum nugas, et vehementer laetor, quod semota contradicendi litigandique materia liceat nunc per re-

(v. *Eius Allgem. Biblioth. d. Bibl. Liter.* T. V. p. 203.) cuius egregiis scriptis in universum plurima accepta refero. Neque tamen *Vir Summus*, eadem libri editione usus esse videtur, cum pag. 5. citaverit.

79) *Opuscul. philol. critic.* p. 224. ed. 2.

liquam commentationis partem cum *Kantianae* disciplinae amicis, si minus omnino in gratiam redire, at pacem certe et concordiam colere. Sunt nimirum, ut ab initio (p. 19.) iam monitum est, alii, qui moralem sive practicam sacrarum literarum interpretationem ita institui praecipiant, ut de sensu scriptoris menti alieno plane non cogitetur, sed quae absoluta grammatica et historica interpretatione universa sint et rationis excultae iudicio probentur, ea in communem usum excerpantur, quae autem contra videantur, una cum orationis et sententiarum involucris atque integumentis, aetati suae suoque populo relinquantur. Atque his inprimis adnumerari debet *venerandus* AMMON 80), quem non incommode Theologorum critico - philosophicorum acutissimum atque ingeniosissimum dixeris. Iam vero facile intelligitur, hanc Codicis S. tractandi rationem ab ipsius *Kantii* praeceptis multum recedere 81), aliterque de ea iudicari debere. Similiter nec hoc difficile

80) Vide locos nota 17. citatos.

81) Multam quidem operam *Celeb. AMMON* dedit, ut nobis persuaderet, *KANTII* etiam hanc eandem esse sententiam, modo non eadem verborum perspicuitate ac diligentia expressam. Sed in hoc ipsi non possum adsentire, videorque mihi in antecedentibus satis demonstrasse, *Kantianam* interpretationis legem ad longe aliud quiddam pertinere.

erit intellectu, multas criminationes, quae in *illam* legem non sine veri specie quadam coniici posse videantur, in *hanc* adeo non cadere, ut potius primo statim obtutu aliqua commendationis nota in ea appareat. Etenim purior sensus, ex huius interpretationis legibus, scriptorum verbis non *infertur* aut *temere affingitur*, sed potius *ex* illis ipsis *elicitur*, neglectis quidem atque omissis, quae sunt negligenda et omittenda. Quare illud etiam in promptu est, *grammaticae* et *historicae* librorum sacrorum interpretationi ullum aliquod periculum ex hoc tractandi genere adeo non imminere, ut ea potius inde multum iuветur, cum non nisi *proprio* verborum sensu rite constituto *moralis* interpretis opera accedere possit ac debeat. Quae quidem omnia, quis est, quin sponte intelligat? et si intellexerit, praeiudicatam suam de his ita definitis *practicorum* interpretum studiis opinionem missam faciat atque immutet? Mihi saltem (quod ingenue profiteor) ea admodum probantur, et quo certius ac tutius aliis quoque de eorum bonitate persuadeam, duae potissimum quaestiones rite solvendae atque expediendae superesse videntur; *una*, an liceat Codicem S. eo, quo dictum est, modo tractare? *altera*, quae sint huius tractationis commoda, qui fructus? De utroque momento *paucis* nunc videbimus, cum temporis et totius libelli angustiae aliaeque plures causae vela orationis, quam possit maxime, contrahi iubeant.

*Licere*

*Licere* autem Codicem S. ita tractare, ut non omnia ac singula eius dicta uno eodemque numero habeantur, quin potius omissis tum vanis et mere arbitrariis praeceptis, tum orationis et sententiarum involucris atque integumentis, scriptorum aetati et populo propriis, quae universe valeant et rationis excultae iudicio probentur, ea sola in communem usum excerpantur ac commenduntur, id quidem inde necessario sequitur, quod multa passim, quae ad *nostros* homines variis de causis nihil plane pertinent, in libris Christianorum sacris vere occurrunt, ut supra (p. 38. seqq.) fusius ostendimus. Quod cum in se etiam negari haud facile possit, et ab intelligentissimo quoque arbitro sponte concedatur, cur, quae inde necessario fluant, iis convenienter agere non liceat? cur igitur distinguere, e religionis disciplina exterminare et omittere, quae distingui, exterminari atque omitti res ipsa suadeat, vel tantillum dubitemus? „At vero largiar, *inquis*, non omnia „Scripturae effata, quippe quae *stricto* sensu solis „auctorum aequalibus scripta fuerint, eadem potest, eodem iure et ambitu ad *nos* pertinere, „adeoque temporarias, locales et certis hominibus proprias notiones a communibus atque universalibus decretis diligenter esse distinguendas; „modus autem, quo ista distinctio, iste delectus „a *moralis* interprete, qualem nunc cogitamus, instituitur, estne ita comparatus, ita certus et

„extra omnem dubitationis aleam positus, ut unus  
 „ille solus admitti probarique debeat? Iudicium  
 „quidem, quo decernatur, quae universa sint et  
 „omnibus omnium aetatum ac nationum homini-  
 „bus pariter aequaliterque scripta, quae non, mo-  
 „ralis interpretes ad aeterna et necessaria rationis  
 „practicae placita unice componi suadet; an vero  
 „id recte praecipitur? estne hoc *κρίτηριον* adeo fir-  
 „mum, certum et ab adversariorum telis munitum,  
 „ut in eo commodè acquiescere possimus?“ Ita  
 est. Cum enim inter omnes sanioris philosophiae  
 amicos et fautores satis constet, quidquid summis  
 boni ac recti notionibus et aeternis purae rationis  
 decretis non conveniat, id nec ad Deum, tam-  
 quam auctorem, referri, nec communibus verae  
 religionis praeceptis recte adnumerari posse atque  
 debere (82); quamnam tu aliam normam, qua ae-  
 que certo ac tuto revelationis cuiusdam in facto  
 positae veritas et divina origo diiudicentur, ora-  
 tionis et sententiarum involucra certis tempori-  
 bus atque hominibus propria a summis et commu-  
 nibus ipsorum auctorum notionibus, veraque dog-  
 mata a falsis aut dubiis distinguantur, praeter ra-  
 tionem practicam constituas? Profecto aut vagum  
 fit et fluctuans omne tuum de talibus rebus iudi-  
 cium, aut hanc nostram decernendi legem et nor-

82) Cf. quae supra (p. 27. sqq.) monita sunt.



mam admittas, necesse est. Nam tertium quoddam vix ac ne vix quidem reperias. Quae cum ita sint, sponte iam apparebit, non licere tantum Codicem S. ex moralis interpretationis, qualis nunc spectetur, legibus tractare, sed rei adeo ipsius rationes hoc idem necessario suadere ac postulare. Neque etiam verendum est, ne ista S. Scripturae tractatio de vera ac propria eius fide atque auctoritate detrahat; imo vero dum institutionem et doctrinam *divinam* ab *humana* inventionem accuratius, quam alias solet fieri, separare docet, eo ipso simul *illius* prae *hac* praestantiam; atque insigne pretium clarius exponit et lucis splendidiore illustrat, non autem deprimit aut obscurat. Quam ob rem nec ab hac parte ullum aliquod impedimentum obstat, quod plenam animi persuasionem de sententiae nostrae veritate merito retardare vel evertere possit.

Quemadmodum vero in communi vita alacriore ac promptiore animo exsequi atque peragere solemus, quod non licere solum et in officiis esse, sed magna etiam atque insignia commoda habere cognovimus, ita sine dubio his nostris quoque consiliis certior ac firmior adensus praebebitur, ubi fructuum iis nexorum et propriorum brevem commemorationem adiecerimus. Atque hic *primo loco* illud afferri meretur, quod sic *certam* quan-

dam normam habeamus, ad quam, tamquam lapidem Lydium, explorare possimus atque definire, quam magis aut minus late extendatur Christianorum dogmatum ac praeceptorum, quae ad *universalem* religionis disciplinam pertineant, ambitus, quot et quae N. T. effata, quoque iure et sensu formulae Christianae, his nostris temporibus accommodatae, vim et naturam constituent. Observatum nimirum est a Viris doctis, eam communem fuisse et necessariam omnium antiquiorum, quae sacris literis superstructae essent, religionum sortem, ut successu temporis aucta quidem ingeniorum humanorum cultura sensim obsolescerent, novamque et pro variatis loci ac hominum rationibus magis minusve immutatam formam induerent 83); neque etiam *Christianam* religionem, quae et qualis in N. T. libris descripta sit, ab hac sorte prorsus immunem esse, itidem monuerunt. 84) Ex quo autem tempore illud factum est, non desierunt etiam doctae controversiae, tum de modo, quo prima religionis Christianae forma optime immutari et ad nostri seculi ra-

83) V. EICHHORNII *Biblioth. d. bibl. Liter.* Vol. V. p. 234. sqq. et POELITZ *Kritik der Religionsphilosophie.* §. 4. p. 38. sqq.

84) Vide scriptores nota 15. laudatos.

tiones revocari posset, tum de finibus, intra quos totum illud distinguendi, purgandi et innovandi studium contineri oporteret; et etiamnum admodum inter se dissentiunt Viri docti, alio quidem rem aliter iudicante ac decernente; id quod mirum non videtur, cum certa quaedam iudicandi norma adhuc nulla esset. Nunc vero eam habemus in illa ipsa moralis interpretationis formula, de qua iam loquimur, et talem quidem habemus, quam non solum bene fundatam esse et omni exceptione maiorem cognovimus, sed quae tuta etiam, facili atque expedita via ad exoptatum finem perducit. Atqui de hoc non laetemur? hunc legis istius fructum non magni faciamus? Sed eadem librorum sacrorum tractandorum formula *secundo loco* hac etiam virtute gaudet, ut omnibus aut certe praecipuis eorum, qui in tradenda et excolenda theologia cum dogmatica tum morali adhuc versati sunt, controversiis finem imponat. Sic v. c. diurnae istae et ingenti saepe animorum motu iteratae, necdum prorsus sopitae lites de rite constituendis articulis fidei fundamentalibus et non fundamentalibus, primariis et secundariis, 85) facili negotio componi ac dirimi pos-

85) Cf. DOEDERLEINIUM in *institut. Theologi Christ.* Part. pr. §. 23. p. 55. sqq. et scriptores ab eo laudatos.

sunt, si haec nostra interpretationis regula admit-  
tatur, quippe quae certam quandam iudicandi ac  
decernendi legem, qua adhuc caruimus, propo-  
nit. 86) Quod autem de hac controversia valet,  
id pari modo ad alias quoque transferri potest.  
Omnibus enim unum idemque firmum atque ido-  
neum *κρίτηριον*, quod ad summam veri et recti nor-  
mam et sine cupiditate quamvis causam ad religio-  
nis disciplinam pertinentem aestimat, constitutum  
videmus. His vero consiliorum nostrorum com-  
modis *tertio loco* illud etiam accedit, quod sic de-  
mum certam spem alere possimus, fore, ut iam  
dudum exoptata rationis cum revelatione concili-  
atio et amicissima utriusque, ab eodem auctore  
profecti, muneris consociatio vere efficiatur. Sci-  
licet inter omnes constat, quantopere Viri docti,  
qui paulo liberiore essent ingenio, propemodum  
inde a Christianae religionis primordiis ad hunc

86) Certae cuiusdam legis, in tractando et perpur-  
gando, difficili hoc loco necessitatem alii quoque  
hac recentissima aetate agnoverunt. Cf. hanc in  
rem TIEFTRUNKII *Censur des Christl. Protestan-  
tischen Lehrbegriffs: Erste Fortsetzung. Cap. III.*  
p. 112. sqq. *Briefe üb. d. Perfectibilität der  
geoffenb. Religion.* p. 288. sqq. *Ueber die Rang-  
ordnung der Christlichen Religionslehren nach der  
Eintheilung in articulos fidei fundamentales et  
non fundamentales, primarios et secundarios; in*  
*HENKII Magazin.* T. IV. P. III. p. 433. sqq.

usque diem in eo desudaverint, ut illius placita cum philosophiae et sanae rationis decretis componerent, quamque variis adminiculis, incommodis etiam, illicitis atque violentis artificiis et machinationibus hanc in rem interdum usi fuerint 87). Est enim profecto molestum aliquid (ne dicam incongruum atque ineptum,) Deum ipsum, qui et rationem et revelationem eodem consilio et ad eundem usum hominibus largitus est, secum pugnantem cogitare; hincque mirum non erat, ut istam repugnantiam, quae videretur, quovis modo remove studerent. Sed varie tamen in universo hoc conciliandi studio peccatum est, ut sit, ubi non ex certis rationibus res aliqua peragitur. Iam vero si nostra Codicis S. tractandi consilia admittantur, pravas omnes et perversas artes excludi, et tamen bene ac commode effici, quod effectum velimus, quis non intelligat? Nunc enim utrumque Dei donum et uterque religionis fons, ratio ac revelatio amicissime conspirat, remota est omnis repugnantia, sublatum omne diffidium. *Ultimo denique loco fructuum, nostrae interpretandi rationi priorum, pono*

87). De Patrum antiquissimorum circa hanc rem studiis v. I. G. ROSENMÜLLERI *de Christianae Theologiae Origine* librum. Lips. 1786. 8. et de recentiorum Theologorum artificiis cf. *Briefe über d. Perfektib. d. geoffenb. Relig.* p. 28. 199.

hunc, qui ad rectiorem aptioremque theologiae tam theticae quam moralis tractationem pertinet, non illum quidem prioribus dignitate ac pretio inferiorem. Nam magna utique sunt, quae in hanc quoque rem redundant, commoda, si consilia nostra probentur. Stat iam certa lex ac norma, ad quam aliena decreta a veris et communibus rectius, quam plerumque solet, seiungantur, singuli loci accuratius collocentur et nectantur, unum ex altero melius derivetur, atque in universum omnia ita instituantur et ordinentur, ut firmitus fiat totius aedificii fundamentum, aptior partium eius proportio, iunctura et locatio, commodior et a temporis vicissitudine atque iniuria tutior constructi operis usus.

Quae cum ita sint, cum non liceat solum, Codicem sacrum ex moralis interpretationis, qualis nunc definita est, legibus tractare, sed res etiam ipsa hanc tractationem postulet, totque ac tanta commoda inde oriantur; cur tandem practicorum omnino omnium interpretum studia indignemur, repudiemus vel adeo illudamus? cur potius notum illud proverbium: *qui bene distinguit, bene docet*: ad nostram quoque rem transferre, et rite separatis, quae sint separanda, vana quidem atque futilia moralis interpretationis praecepta, a nonnullis proposita, mittere

et auctoribus relinquere; veris autem ac certis aliorum monitis aures et adfensum praebere nolimus? an vero turpissimae pertinaciae et summae cuiusdam cupiditatis homine liberali indignae rei fieri malimus? Sed dubium non est, quin talis interpretandi ratio, qualem ipse commendavi, plures sensim amicos et fautores nanciscatur, dummodo utraque litigantium pars alterius mentem et sententiam rectius edocta fuerit, cum non solum ex *Kantianae* disciplinae sectatoribus, sed ex iis etiam ipsis, qui KANTII praecepta impugnarunt, unus et item alter reperti sint, qui singuli de his nostris consiliis, si summam rei spectes, amicissime consentirent 88). Agite igitur! in gratiam redeatis, pacemque et concordiam colatis, Vos, summa nomina et insignia reipublicae literatae cum universae tum inprimis theologicae ornamenta! Absit ab animis vestris pertinacia et clandestinum odium, a studiis calumnia! neque committatis, ut improba illa, per mutuos errores potissimum mota nec fine acerbitate quadam agitata, de rite et ad seculi nostri rationes accommodate tractando Codice sacro, controversia longius Vos invicem discordes te-

88) Pertinent huc de illis, AMMON, POELITZ, de his, EICHHORN, ECKERMANN, alii.

neat! Iunctis potius viribus in hoc uno elaboratis ut everso destructoque superstitionis, caecae fidei et male sanae pietatis imperio, virtutis ac veritatis regnum in dies latius propagetur! Sic tandem Vobis omnibus ac singulis et iis etiam, qui ad vestram similitudinem adspicient, fausta quaevis contingant!

Missis levioribus operarum vitiis, maxime in distinguendi signis, haec fere errata vidi, quae Lector Benevolus emendet, oro:

pag. 2. nota 2. versu 8. pro המטורה lege המטורה

— 17. versu 2. et 3. pro *feriatet* l. *feriat et*

— 25. — 8. pro *disquisitioni* l. *disquisitionis*.

— 36. — 5. pro *praeseferat* l. *prae se ferat*.

— 45. nota 31. versu 1. pro *et doctē* l. *at doctē*.

— 46. versu ultimo pro *disputationem* l. *disputationem*.

— 76. versu 16. pro *quam* l. *quae*

— 100. — 3. pro *applaudet* l. *applaudat*.



